

C40  
4514  
129

5  
6  
7  
8  
9  
80  
1  
2  
3  
4  
5  
6  
7  
8  
9  
30  
1  
2  
3  
4  
5  
6  
7  
8  
9  
100  
1  
2  
3  
4



5  
6  
7  
8  
9  
10  
11  
12  
13  
14  
15  
16  
17  
18  
19  
20  
21  
22  
23  
24  
25

C40-4514

以翁王座請大藏及有  
東晉聖武州紫雲山  
我似安塔陸度府中永  
為學者不敢許出院內  
晉山二世鐵牛機謹誌



B 64853

瑜伽師地論卷第十六

彌勒菩薩說

唐三藏沙門玄奘奉詔譯

本地分中思所成地第十一之一

已說聞所成地云何思所成地當知略說由三種相  
一由自性清淨故二由思擇所知故三由思擇諸法  
故云何自性清淨謂九種相應知一者謂如有一獨  
處空閑審諦思惟如其所聞如所究達諸法道理二  
者遠離一切不思議處審諦思惟所應思處三者能  
善了知默說大說四者凡所思惟唯依於義不依於



文五者於法少分唯生信解於法少分以慧觀察六者堅固思惟七者安住思惟八者相續思惟九者於所思惟能善究竟終無中路厭怖退屈由此九相名爲清淨善淨思惟云何思擇所知謂善思擇所觀察義何等名爲所觀察義謂於有法了知有相於非有法了知無相如是名爲所觀察義何等名爲所觀有法當知此法略有五種一自相有法二共相有法三假相有法四因相有法五果相有法何等名爲自相有法當知此法略有三種一勝義相有二相狀相有三現在相有勝義相有者謂諸法中離言說義出世

間智所行境界非安立相相狀相有者謂由四種所觀相狀一於是處名可得二於是處事可得三此名於此事非不決定謂或迷亂不決定故或無常不決定故四此名於此事無礙隨轉非或於是處隨轉或於是處退還現在相有者謂若已生及因果性如是一切總說爲一自相有法何等名爲共相有法當知此相復有五種一種類共相二成所作共相三一切行共相四一切有漏共相五一切法共相種類共相者謂色受想行識等各別種類總名爲一種類共相成所作共相者謂善有漏法於感愛果由能成辦所

作共相說名共相如善有漏法於感受果如是不善法於感非愛果念住正勝神足根力覺支道支菩提分法於得菩提由能成辦所作共相說名共相當知亦爾一切行共相者謂一切行無常性相一切有漏共相者謂有漏行皆苦性相一切法共相者謂一切法空無我性相如是一切總說爲一共相有法何等名爲假相有法謂若於是處略有六種言論生起當知此處名假相有何等名爲六種言論謂屬主相應言論遠離此彼言論衆共施設言論衆法聚集言論不徧一切言論非常言論屬主相應言論者謂諸言

論配屬於主方解其相非不屬主如說生時此誰之生待所屬主起此言論謂色之生受想行識之生非說色時此誰之色待所屬主起此言論如生如是者住無常等心不相應行隨其所應盡當知是名屬主相應言論若於是處起此言論當知此處是假相有遠離此彼言論者謂諸言論非以此顯此亦非以彼顯彼是說名爲遠離此彼言論若以此顯此言論是言論亦於實相處轉亦於假相處轉若以彼顯彼言論是言論亦於實相處轉亦於假相處轉若非以此顯此亦非以彼顯彼亦論是言論一向於假相處轉

云何以此顯此言論於實相處轉如言地之堅云何此復於假相處轉如言石之圓如地之堅石之圓如是水之濕油之滴火之煖燬之燄風之動飄之鼓亦爾云何以彼顯彼言論於實相處轉如言眼之識身之觸如是等云何此復於假相處轉如言佛授德友之所飲食車乘衣服莊嚴具等云何非以此顯此亦非以彼顯彼言論一向於假相處轉如言宅之門舍之壁瓶之口甕之腹軍之車林之樹百之十之三如是等是名遠離此彼言論衆共施設言論者謂於六種相狀言說自性假立言論六種相狀者一事相

狀二所識相狀三淨妙等相狀四饒益等相狀五言說相狀六邪行等相狀事相狀者謂識所取所識相狀者謂作意所取能起於識淨妙等相狀者謂觸所取饒益等相狀者謂受所取言說相狀者謂想所取邪行等相狀者謂思所取衆法聚集言論者謂於衆多和合建立自性言論如於內色受想行識建立種種我等言論於外色香味觸等事和合差別建立宅舍瓶衣車乘軍林樹等種種言論不徧一切言論者謂諸言論有處隨轉有處旋還如於舍宅舍宅言論於諸舍宅處處隨轉於村聚落亭邏國等卽便旋還

於瓮甕等瓮等言論於瓮甕等處處隨轉於瓶器等  
卽便旋還於軍軍言隨諸軍轉於別男女幼少等類  
卽便旋還於林林言隨諸林轉於別樹根莖枝條葉  
華果等類卽便旋還非常言論者由四種相應知一  
由破壞故二由不破壞故三由加行故四由轉變故  
破壞故者謂瓶等破已瓶等言捨瓦等言生不破壞  
故者謂種種物共和合已或丸或散種種雜物差別  
言捨丸散言生加行故者謂於金段等起諸加行造  
環釧等異莊嚴具金段等言捨環釧等言生轉變故  
者謂飲食等於轉變時飲食等言捨便穢等言生如

是等類應知名爲非常言論隨於諸物發起如是六  
種言論當知此物皆是假有是名假相有法何等名  
爲因相有法當知是此因略有五種一可愛因二不  
可愛因三長養因四流轉因五還滅因可愛因者謂  
善有漏法不可愛因者謂不善法長養因者謂前前  
所生善不善無記法修習善修習多修習故能令後  
後所生善不善無記法展轉增勝名長養因流轉因  
者謂由此種子由此熏習由此助伴彼法流轉此於  
彼法名流轉因還滅因者謂諸行還滅雜染還滅所  
有一切能寂靜道能般涅槃能趣菩提及彼資糧并

其方便能生能辦名還滅因如是總名因相有法若  
廣分別如思因果中應知其相何等名爲果相有法  
謂從彼五因若生若得若成若辦若轉當知是名果  
相有法何等名爲所觀無法當知此相亦有五種一  
未生無二已滅無三互相無四勝義無五畢竟無未  
生無者謂未來諸行已滅無者謂過去諸行互相無  
者謂諸餘法由所餘相若遠離性若非有性或所餘  
法與諸餘法不和合性勝義無者謂由世俗言說自  
性假設言論所安立性畢竟無者謂石女兒等畢竟  
無類復有五種有性五種無性何等名爲五種有性

一圓成實相有性二依他起相有性三徧計所執相  
有性四差別相有性五不可說相有性此中初是勝  
義相第二是緣生相相第三是假施設相相第四是不  
二相生相老相住相無常相苦相空相無我相事相  
所識相所取相淨妙等相饒益等相言說相相邪行  
等相相如是等相應知名差別相第五由四種不可  
說故名不可說相一無故不可說謂補特伽羅於彼  
諸蘊不可宣說若異不異二甚深故不可說謂離言  
法性不可思議如來法身不可思議諸佛境界如來  
滅後若有若無等不可宣說三能引無義故不可說

謂有諸法非能引發法義梵行諸佛世尊雖說不說  
四法相法爾之所安立故不可說所謂真如於諸行  
等不可宣說異不異性何等名爲五種無性一勝義  
相無性二自依相無性三畢竟自相無性四無差別  
相無性五可說相無性云何思擇諸法此復二種應  
知一思擇素咀纜義二思擇伽他義思擇素咀纜義  
如攝事分及菩薩藏教授中當廣說思擇伽他義復  
有三種一者建立勝義伽他二者建立意趣義伽他  
三者建立體義伽他建立勝義伽他者如經言  
都無有宰主 及作者受者 諸法亦無用

而用轉非無	唯十二有支	蘊處界流轉
審思此一切	衆生不可得	於內及於外
是一切皆空	其能修空者	亦常無所有
我我定非有	由顛倒妄計	有情我皆無
唯有因法有	諸行皆剎那	住尚無況用
卽說彼生起	爲用爲作者	眼不能見色
耳不能聞聲	鼻不能嗅香	舌不能嘗味
身不能覺觸	意不能知法	於此亦無能
任持驅役者	法不能生他	亦不能自生
衆緣有故生	非故新新有	法不能滅他

亦不能自滅	衆緣有故生	生已自然滅
由二品爲依	是生便可得	恒於境放逸
又復邪升進	愚癡之所漂	彼遂邪升進
諸貪愛所引	於境常放逸	由有因諸法
衆苦亦復然	根本二惑故	十二支分二
自無能作用	亦不由他作	非餘能有作
而作用非無	非內亦非外	非二種中間
由行未生故	有時而可得	設諸行已生
由此故無得	未來無有相	過去可分別
分別曾所更	非曾亦分別	行雖無有始

然有始可得	諸色如聚沫	諸受類浮泡
諸想同陽燄	諸行喻芭蕉	諸識猶幻事
日親之所說	諸行一時生	亦一時住滅
癡不能癡癡	亦不能癡彼	非餘能有癡
而愚癡非無	不正思惟故	諸愚癡得生
此不正思惟	非不愚者起	福非福不動
行又三應知	復有三種業	一切不和合
現在速滅壞	過去住無方	未生怨衆緣
而復心隨轉	畢竟共相應	不相應亦爾
非一切一切	而說心隨轉	於此流無斷

相似不相似	由隨順我見	世俗用非無
若壞於色身	名身亦隨滅	而言今後世
自作自受果	前後差別故	自因果攝故
作者與受者	一異不可說	因道不斷故
和合作用轉	從自因所生	及攝受所作
樂戲論爲因	若淨不淨業	諸種子異熟
及愛非愛果	依諸種異熟	我見而生起
自內所證知	無色不可見	無了別凡夫
計斯爲內我	我見爲依故	起衆多妄見
總執自種故	宿習助伴故	聽聞隨順故

發生於我見	貪愛及與緣	而生於內我
攝受希望故	染習外爲所	世間真可怖
愚癡故攝受	先起愛藏已	由茲趣戲論
彼所愛藏者	賢聖達爲苦	此苦逼愚夫
剎那無暫息	不平等纏心	積集彼衆苦
積集是愚夫	計我苦樂緣	諸愚夫固著
如大象溺泥	由癡故增上	徧行徧所作
此地派衆流	於世流爲暴	非火風日竭
唯除正法行	於苦計我受	苦樂了知苦
分別此起見	從彼生生彼	染汙意恒時

諸惑俱生滅 若解脫諸惑 非先亦非後  
非彼法生已 後淨異而生 彼先無染汙  
說解脫衆惑 其有染汙者 畢竟性清淨  
既非有所淨 何得有能淨 諸種子滅故  
諸煩惱盡故 卽於此無染 顯示二差別  
自內所證故 唯衆苦盡故 永絕戲論故  
一切無戲論 衆生名相續 及法想相中  
無生死流轉 亦無涅槃者

此中依止補特伽羅無我勝義宣說如是勝義伽他  
爲欲對治增益損減二邊執故於所攝受說爲宰主  
於諸業用說爲作者於諸果報說爲受者如是半頌  
遮遣別義所分別我諸法亦無用者遮遣卽法所分  
別我由此遠離增益邊執而用轉非無者顯法有性  
由此遠離損減邊執用有三種一宰主用二作者用  
三受者用因此用故假立宰主作者受者雖言諸法  
而未宣說何等爲法故次說言唯有十二支等半頌  
如有支次第諸蘊等流轉此顯不取微細多我便能  
對治宰主作者及受者執眼色爲緣生眼識果無別  
受者此中顯示卽十八界說受者性雖言無主而未  
宣說無何等主爲欲顯示故次說言審思此一切衆

論  
孫佛師其說卷二十六  
生不可得言審思者由依三量審諦觀察此若無者  
云何建立內外成就故次說言於內及於外是一切  
皆空此顯內外唯假建立云何建立能觀所觀二種  
成就故次說言其能修空者亦常無所有云何建立  
聖者異生二種成就故次說言我我定非有由顛倒  
妄計此顯聖者及異生我決定無有真實我性唯由  
顛倒妄計爲有云何建立彼此成就故次說言有情  
我皆無云何建立染淨成就故次說言唯有因法有  
染者淨者皆不可得雖說諸法皆無作用而未宣說  
云何無用故次說言諸行皆剎那住尚無況用如前

已說用轉非無云何無用而有用轉故次說言卽說  
彼生起爲用爲作者果故名爲用因故名作者彼生  
起者顯從諸處諸識得生彼得生者非離眼等彼成  
就故如前所說諸法無用此顯無用略有七種一無  
作用用謂眼不能見色等二無隨轉用謂於此亦無  
能住持驅役者如其次第主宰作者俱無所有故無  
有能隨轉作用三無生他用謂法不能生彼四無自  
生用謂亦不能自生五無移轉用謂衆緣有故生非  
故新新有六無滅他用謂法不能滅他七無自滅用  
謂亦不能自滅問如衆緣有故生亦衆緣有故滅耶

答衆緣有故生生已自然滅如前所說有因法有欲顯在家及與出家雜染自性有因法有故次說言由二品爲依是生便可得等由此二頌顯無明愛有因法有次後五頌顯雜染品差別所依因及時分此中有因諸法者謂無明乃至受有因衆苦者謂愛乃至老死此言顯示煩惱業生三種雜染根本二惑故者此言顯示煩惱雜染唯取最勝煩惱雜染自無能作用等言復重別顯業雜染義由彼所作有差別故彼果異熟不思議故自無能作用者待善惡友他所引故亦不由他作者待自功用所成辦故非餘能有作者要待前生因差別故方有所作非內亦非外等頌中顯依未來不生雜染依止現在過去諸行能生雜染設行已生卽由此相無有分別未來無相故無分別如此如是當來決定不可知故若不如是分別異類或時可得若於過去卽可分別如此如是曾有相貌可分別故非唯曾更而可分別未曾更者雖不分明取其相貌然隨種類亦可分別此則顯示依現在行分別爲因生諸雜染行雖無始然始可得者顯示雜染時分差別無始時來常隨逐故剎那剎那新所起故自此已後顯清淨品如實觀時得清淨故或由

自相故謂觀色等如聚沫等或由共相故謂觀有爲  
同生住滅所有共相或由世俗及勝義諦故謂雖無  
癡者非無愚癡衆緣所生世俗諦故說癡能癡又復  
顯示非不愚者不正思惟是故彼爲愚癡所癡又由  
世俗宣說諸識隨福等行若就勝義無所隨逐又三  
應知者謂去來今三種業者謂身等業一切不和合  
者更互相望不和合故所以者何現在速滅壞過去  
住無方未來依衆緣而復心隨轉若彼與此更互相  
應如福等行無有和合彼心相應道理亦爾云何當  
有實隨轉性何以故若心與彼諸行相應或不相應  
非此與彼或時不相應或時非不相應又非一切心  
或相應或不相應如是由勝義故心隨轉性不得成  
就今當顯示由世俗故說心隨轉所有因緣於此流  
無斷者今此頌中顯世俗諦非無作用及與隨轉又  
由勝義無有作者及與受者由世俗故而得宣說自  
作自受又作者受者若一若異皆不可說爲顯此義  
故次說言前後差別等頌如是由勝義故無有宰主  
作者受者唯有因果於因果相釋通疑難略由五頌  
顯示於此起我顛倒初頌顯示雖無有我而有後有  
無有斷絕又諸因果非頓俱有非從一切一切得生

又此因道無有斷絕頌中四句如其次第釋此四難  
由第二頌顯因果相由後三頌顯於無我諸因果中  
起我顛倒此中顯示彼所緣境彼所依止彼因彼果  
初頌顯示彼所緣境自內所證無色難見難可尋思  
故名無色經說色相爲尋思故難說示他故不可見  
由第二頌顯彼依果凡夫是依衆見是果由第三頌  
顯示彼因俱生我見由總執計自種隨眠之所生起  
諸外道等分別我見由宿習等之所生起此外道見  
要由數習故不正尋思故又得隨順從他聽聞非正  
法故而得生長此中顯示由所依止作意所緣諸過

失故分別我見方得生起次後五頌顯彼我見由集  
次第發生於苦又卽此苦并及我見二苦因緣又於  
解脫能爲障礙此中初頌顯示於集第二第三顯示  
行苦所攝阿賴耶識愛藏此已而趣戲論謂我當有  
非當有等言愛藏者攝爲已體故又復此苦於一切  
時恒常隨逐無一剎那而暫息者由第四頌顯示此  
苦是能計我及苦樂緣由第五頌顯示計我由愚癡  
故障礙解脫言增上者望餘二苦故言徧行者隨逐  
諸受故徧所作者徧善惡無記故今當顯示阿賴耶  
識所攝行苦共他相似又顯差別由正法行方能竭



槃者已釋勝義聖教伽他次當建立意趣義伽他如  
經言一時索訶世界主大梵天王往世尊所頂禮佛  
足退坐一面以妙伽他而讚請曰

於學到究竟 善斷諸疑網 今請學所學  
修學爲我說 大仙應善聽 學略有三種  
增上戒心慧 於彼當修學 應圓滿六支  
四樂住成就 於四各四行 智慧常清淨  
初善住根本 次樂心寂靜 後聖見惡見  
相應不相應 先淨樂靜慮 及於諦善巧  
卽於諸諦中 應生遠增長 於諸學處中

有四趣三所 遠離於二趣 於二趣證得  
二安住二種 一能趣涅槃 漸次爲因緣  
純雜而修習 最先離惡作 最後樂成滿  
諸學是爲初 於此學聰叡 由此智修淨  
淨生樂成滿 諸學是爲中 於此學聰叡  
從此心解脫 永滅諸戲論 諸學是爲尊  
於此學聰叡 若行趣不淨 亦趣於善趣  
是行說爲初 當知此非共 若行趣清淨  
非諸趣究竟 是行說爲中 當知亦非共  
若行趣清淨 於諸趣究竟 是行說爲尊

當知此必共	若有學無學	當知並聰叡
若有學無學	當知並愚夫	若棄捨攝受
亦斷除麤重	及現見所知	是受持三學
若有緣無緣	亦細麤顯現	由受持遠離
言發悟所引	初學唯有一	第二學二種
第三學具三	慧者皆超越	不毀壞尸羅
於學誓能順	軌範無譏論	於五處遠離
若無犯出離	無惡作惡作	於彼學尋求
及勤修彼行	終無有棄捨	命難亦無虧
常住正行中	隨毗柰耶轉	修治誓為先

亦修治淨命	二邊皆遠離	亦棄捨邪願
於諸障礙法	終無有耽染	亂心法纔生
尋當速遠離	非太沉太浮	恒善住正念
根本眷屬淨	而修行梵行	應發勤精進
常堅固勇猛	恒修不放逸	五支善安住
當隱自諸善	亦發露眾惡	得諸衣服等
麤妙皆歡喜	少隨於世務	麤弊亦隨轉
受杜多功德	為寂離煩惱	當具足威儀
應量而攝受	終無有所為	詐現威儀相
不自說實德	亦不令他說	雖有所方求

而非現異相 從他邊乞求 終不强威逼  
以法而獲得 得已不輕毀 不耽著利養  
及所有恭敬 亦不執諸見 增益與損減  
不著順世間 無義文呪術 亦不樂畜積  
無義長衣鉢 恐增諸煩惱 不染習居家  
爲淨修智慧 當親近賢聖 不畜朋友家  
恐發憂悲亂 能生苦煩惱 纔起尋遠離  
不受於信施 恐加害瘡炮 於如來正法  
嘗無有棄捨 於他憊犯中 無功用安樂  
常省自過失 知已速發露 若犯於所犯

當如法遠離 所應營事中 能勇勵自作  
於佛及弟子 威德與言教 一切皆信受  
觀大罪不諱 於極甚深法 不可思度處  
能捨舊師宗 不堅執自見 常樂居遠離  
及邊際臥具 恒修習善法 堅精進勇猛  
無有欲生欲 不憎惡憎惡 離睡眠睡眠  
時不居寂靜 離惡作惡作 無希慮希慮  
一切種恒時 成就正方便 引發與覺悟  
及和合所結 有相若親昵 亦多種喜樂  
侵逼極親昵 名虛妄分別 能生於欲貪

智者當遠離 諸欲令無飽 衆多所共有  
是非法因緣 能增長貪愛 賢聖所應離  
速趣於壞滅 仗託於衆緣 危逸所依地  
諸欲如枯骨 亦如輒肉段 如草炬相似  
猶如大火坑 譬如蟒毒蛇 亦如夢所見  
如借莊嚴具 如樹端熟果 如是知諸欲  
都不應耽樂 當聽聞正法 常思惟修習  
先觀見麤靜 次於修一向 捨煩惱麤重  
於斷生欣樂 於諸相觀察 得加行究竟  
能離欲界欲 及離色界欲 入真諦現觀

能離一切欲 證現法涅槃 及餘依永盡  
於學到究竟善斷諸疑網今請學所學修學爲我說  
者於此頌中大梵天王先讚世尊後與請問讚世尊  
者謂於一切學中已得第一究竟此依自利行圓滿  
不共德說又能善斷展轉所生一切疑網此依利他  
行圓滿不共德說與請問者何等爲學學有幾種云  
何於彼當修學耶是故世尊意爲策勵怖多所作懈  
怠衆生總攝一切略說三學故次告曰大仙應善聽  
學略有三種增上戒心慧於彼當修學此中顯示依  
戒心慧若散亂者令不散亂方便爲說增上戒學心

未定者爲令得定方便爲說增上心學心已得定未  
解脫者爲令解脫方便爲說增上慧學由此因緣諸  
修行者一切所作皆得究竟此顯世尊密意宣說一  
切諸學無不攝在此三學中又爲顯示於諸學中由  
此方便成辦所學故次說言應圓滿六支四樂住成  
就於四各四行智慧常清淨今此頌中如其次第顯  
示成辦三學方便應圓滿六支者應依增上戒學方  
便修學何等六支一安住淨尸羅二守護別解脫律  
儀三軌則圓滿四所行圓滿五於諸小罪見大怖畏  
六受學學處如是六支顯示四種尸羅清淨安住淨  
尸羅者是所依根本守護別解脫律儀者顯示出離  
尸羅清淨爲求解脫而出離故軌則所行俱圓滿者  
此二顯示無所譏毀尸羅清淨於諸小罪見大怖畏  
者顯無穿缺尸羅清淨受學學處者顯無顛倒尸羅  
清淨如是六支極圓滿故增上戒學與餘方便作所  
依止四樂住成就者顯示增上心學方便四種靜慮  
名四心住現法樂住故名爲樂於四各四行智慧常  
清淨者依增上慧學說謂於苦集滅道四聖諦中一  
一皆有四行卽無常等增上慧學由此淨智之所顯  
故初善住根本次樂心寂靜後聖見惡見相應不相

應者此頌顯示增上三學次第生起根本者謂增上  
戒由後二種是此初學所流類故既具尸羅由無悔  
等次第修習能得第二心樂靜定心得定者見如實  
故能得第三成就聖見遠離惡見先淨樂靜慮及於  
諦善巧卽於諸諦中應生遠增長者此頌顯示三學  
次第清淨差別先淨者是初學樂靜慮者是第二學  
於諦善巧者是第三學又於如是諦善巧中應生者  
謂道諦應生起故應遠者謂苦集諦應遠離故應增  
長者謂滅諦輒中上品煩惱次第數漸斷增長減  
故於諸學處中有四趣三所遠離於二趣於二趣證

得者此頌顯示於增上戒心慧學處由所修學有成  
敗故隨其所應所得果報四趣差別謂於欲界人天  
所攝所有善趣是增上戒成所得果卽於欲界餘趣  
所攝所有惡趣是增上戒敗所得果色無色界天趣  
所攝所有上趣是增上心果三界所不攝涅槃趣是  
增上慧果於如是諸趣中遠離前二善趣惡趣已應  
證後二上趣及涅槃趣此言顯示世出世間二道所  
得二安住二種一能趣涅槃漸次爲因緣純雜而修  
習者於此頌中顯示最初增上戒學增上心學漸次  
能爲增上心學增上慧學安住因緣顯示中間增上

論  
孫佛師地論卷十六  
二二二  
一  
慧靜慮律儀所攝增上戒學能爲二種安住因緣顯示最上一種能爲涅槃安住因緣當知此中顯示修習若別若總隨其所應最先離惡作最後樂成滿諸學是爲初於此學聰叡者此頌顯示由增上戒學以無悔等漸次修習爲後轉因由此智修淨淨生樂成滿諸學是爲中於此學聰叡者此頌顯示由增上心學修所成慧最勝善根漸次生故爲最上學因從此心解脫永滅諸戲論諸學是爲尊於此學聰叡者此頌顯示由增上慧學能爲最勝涅槃果因若行趣不淨亦趣於善趣是行說爲初當知此非共者此頌顯

示增上戒學若有敗毀爲惡趣因若能成立爲善趣因此是不共離後二學亦能成故若行趣清淨非諸趣究竟是行說爲中當知亦非共者此頌顯示中間學行離欲界欲得清淨故名趣清淨未能盡離上界欲故亦未永拔欲隨眠故不得名爲於諸趣中究竟清淨此離最上亦能成辦故名不共非離最初若行趣清淨於諸趣究竟是行說爲尊當知此必共者此頌顯示最上學行三界諸欲皆遠離故亦能永拔諸隨眠故於諸趣中最爲究竟不離前二能獨成辦故名必共若有學無學當知並聰叡者此初半頌顯示

論  
三  
十一  
於三學中聰叡者相有正學故無邪學故若有學無  
學當知並愚夫者此後半頌顯示於三學中愚夫之  
相有邪學故無正學故若棄捨攝受亦斷除麤重及  
現見所知是受持三學者此頌顯示若能棄捨家親  
屬等所攝受故若能斷除三摩地障諸麤重故若能  
現見四聖諦相所知理故如其次第三學成滿若有  
緣無緣亦細麤顯現者此初半頌顯後二學及最初  
學如其次第有緣無緣細麤差別由受持遠離言發  
悟所引者此後半頌顯初中後如其次第引發因緣  
謂誓期所引故身心遠離所引故由他言音內正思

惟所引故初學唯有一第二學二種第三學具三慧  
者皆超越者此頌顯示初一不共中不離初上不離  
二超彼一切當知無學是阿羅漢不毀壞尸羅於學  
誓能順軌範無譏論於五處遠離者此後顯示受持  
戒相不毀壞尸羅於學者謂安住淨戒誓能順者謂  
守護別解脫律儀軌範無譏論者謂軌則無犯於五  
處遠離者謂所行無犯略有五處諸苾芻等非所應  
行謂王家唱令家酤酒家倡穢家旃荼羅及羯恥那  
家唱令家者謂屠羊等由徧宣告此屠羊等成極重  
罪多造惡業殺害羊等故若無犯出離無惡作惡作

者顯示於諸小罪見大怖畏如其出離亦無惡作如其惡作亦無有犯於彼學尋求及勤修彼行者顯示受學學處終無有棄捨命難亦無虧常住正行中隨毗柰耶轉者此頌四句如其次第顯示常尸羅性堅尸羅性恒所作性恒隨轉性修治誓爲先亦修治淨命者此初半頌顯示軌範及命清淨由諸軌範先發誓願方乃修行故名爲誓二邊皆遠離亦棄捨邪願者此後半頌顯示遠離受用欲樂自苦二邊及棄捨生天等願故尸羅清淨於諸障礙法終無有耽染亂心法纔生尋當速遠離者此頌顯示於諸根門不守

護等障礙清淨所學法中不見功德無耽染故於諸不善欲恚尋等擾亂意法雖暫生已卽除遣故學得清淨非太沉太浮恒善住正念根本眷屬淨而修行梵行者此頌顯示遠離微劣惡作故遠離非處惡作故遠離失念故於究竟時及方便時修行梵行皆得清淨

瑜伽師地論卷第十六

音釋

燬許委切 甕烏貢切 邏郎佐切 瓮蒲奔切 瘡瘡 胞尼質切 蟒莫朗切  
良切胞 尼質切 蟒莫朗切  
匹貌切胞 近也蟒 大蛇也

論

瑜伽師地論卷十六

二五

5  
6  
7  
8  
9  
80  
1  
2  
3  
4  
5  
6  
7  
8  
9  
90  
1  
2  
3  
4  
5  
6  
7  
8  
9  
100  
1  
2  
3  
4  
5

明故南京都察院神寧金壇善雲居士于明  
遺銀帶一圖刻此  
瑜伽師地論第十六卷  
長沙徐普書  
上

瑜伽師地論卷第十七

彌勒菩薩說

唐三藏沙門玄奘奉詔譯

本地分中思所成地第十一之二

應發勤精進常堅固勇猛恒修不放逸五支善安住者此頌顯示由被甲方便無退精進故修習五支不放逸故令所修學清淨殊勝五支不放逸者謂去來今先時所作及俱所行當隱自諸善亦發露衆惡得諸衣服等麤妙皆歡喜少隨於世務麤弊亦隨轉受杜多功德爲寂離煩惱者此二頌顯示遠離眷屬貪

欲多欲不知足因故及遠離多欲不知足障淨學因  
故學得清淨當具足威儀應量而攝受終無有所爲  
詐現威儀相者此頌顯示具足威儀故不於他前詭  
現相故凡所攝受善知量故爲修梵行資持壽命有  
所受故學得清淨不自說實德亦不令他說雖有所  
方求而非現異相從他邊乞求終不强威逼以法而  
獲得得已不輕毀者此二頌中顯示遠離綺言說故  
詭現相故强威逼故以所得利轉招利故令所修學  
清淨殊勝不耽著利養及所有恭敬亦不執諸見增  
益與損減者此頌顯示不耽著利養恭敬故不執著

五種惡見故今所修學清淨殊勝不著順世間無義  
文呪術亦不樂畜積無義長衣鉢者此頌顯示不執  
著諸惡見因外道邪論以能障礙取蘊解脫彼所制  
造名順世間及遠離耽著利養恭敬因長衣鉢等因  
清淨故學得清淨恐增諸煩惱不染習居家爲淨修  
智慧當親近賢聖者此頌顯示遠離所治因親近能  
治因故學得清淨不畜朋友家恐發憂悲亂能生苦  
煩惱纔起尋遠離者此頌顯示若親近居家生憂悲  
散亂增長諸煩惱能爲衆苦因由親近彼能生衆苦  
煩惱纔生尋卽除遣如是顯示對治之因不受於信

施恐加害瘡炮於如來正法嘗無有棄捨者此頌顯  
示不耽著利養恭敬不堅執諸惡邪見不虛受用信  
施不毀謗正法亦能遠離貪著後世諸欲及能生起  
諸惡見因如有所學清淨殊勝於他憊犯中無功用  
安樂常省自過失知已速發露者此頌顯示遠離作  
意求覓他人所有過失於自善品無有散亂常生歡  
喜於自過失如實了知發露悔除離增上慢由此因  
緣學得清淨若犯於所犯當如法出離所應營事中  
能勇勵自作者此頌顯示出離所犯及能遠離貪受  
他人恭奉侍衛由此因緣學得清淨於佛及弟子威

德與言教一切皆信受觀大罪不謗者此頌顯示信  
圓滿故於能誹謗見大罪故學得清淨於極甚深法  
不可思度處能捨舊師宗不堅執自見者此頌顯示  
遠離安住自見取故清淨殊勝常樂居遠離及邊際  
臥具恒修習善法堅精進勇猛者此頌顯示若身若  
心皆遠離故習近順定諸臥具故遠離一切不善尋  
思純修白淨諸善法故非沉掉等諸隨煩惱所摧蔽  
故能善圓滿正加行故增上心學方便殊勝無有欲  
生欲不憎惡憎惡離睡眠睡眠時不居寂靜離惡作  
惡作無希慮希慮一切種恒時成就正方便者此二

頌中顯示遠離貪欲瞋恚昏沉睡眠掉舉惡作及疑  
蓋故於諸善法生起欲故於諸欲中極憎厭故爲修  
善品方便加行有所堪任及心安靜於時時間習睡  
眠故若心沉沒或慮彼生於淨妙相思惟作意及遊  
行時不居靜故於先所犯便生憂悔於所不犯無憂  
悔故後後殊勝生希慮故殷重無間正方便故增上  
心學轉得清淨引發與覺悟及和合所結有相若親  
昵亦多種喜樂侵逼極親昵名虛妄分別能生於欲  
貪智者當遠離者此二頌中顯示八種虛妄分別能  
生姪欲所有貪愛從初方便次第生起乃至究竟由

遠離故諸所修學清淨殊勝引發分別者謂能引發  
於可愛事不正思惟相應之心所有分別覺悟分別  
者謂卽於彼可愛事中覺悟貪纏相應分別和合所  
結分別者謂卽於彼可愛事所有分別有相分別  
者謂卽於彼可愛事中執取種種淨妙相狀所有分  
別親昵分別者謂於已得所愛事中勇勵相應所有  
分別喜樂分別者謂卽於彼所得事中種種受用希  
慕愛樂種種門轉所有分別侵逼分別者謂兩根會  
時所有分別極親昵分別者謂不淨出時所有分別  
諸欲令無飽衆多所共有是非法因緣能增長貪愛

賢聖所應離速趣於壞滅仗託於衆緣危逸所依地者此二頌中顯示八種現法後法如其所應諸欲過患若能觀見卽是斷除欲愛方便諸欲如枯骨亦如輓肉段如草炬相似猶如大火坑譬如蝨毒蛇亦如夢所見如借莊嚴具如樹端熟果如是知諸欲都不應耽樂者此中廣引如前所說令無飽等於諸欲中八種過患一切世間共成譬喻顯示諸欲過患深重又爲顯示於諸欲中具有如是衆多過患分明可了何有智者於彼耽樂又彼諸欲如枯骨故令無飽滿如段肉故衆多共有猶如草炬正起現前極燒惱故

非法因緣如大火坑生渴愛故增長貪愛如蝨毒故賢聖遠離如夢見故速趣壞滅猶如假借莊嚴具故仗託衆緣猶如樹端爛熟果故危亡放逸所依之地當聽聞正法常思惟修習先觀見麤靜次於修一向捨煩惱麤重於斷生欣樂於諸相觀察得加行究竟能離欲界欲及離色界欲入真諦現觀能離一切欲證現法涅槃及餘依永盡者此中顯示由了相等七種作意世出世道皆清淨故證得有餘及無餘依二涅槃果增上慧學究竟清淨聽聞正法常思惟言顯示了相作意常修習言顯示勝解作意由起勝解而

論  
修習故先觀見麤靜言顯示遠離作意於修習一向  
等言顯示攝樂作意於諸相觀察言顯示觀察作意  
加行究竟言顯示加行究竟作意能離欲界欲及離  
色界欲入真諦現觀能離一切欲等言顯示世間出  
世間方便究竟果作意已釋意趣義聖教伽他今當  
建立體義伽他如頌言

於身語意諸所有

一切世間惡莫作

由念正知離諸欲

勿親能引無義苦

今此頌中所言惡者謂諸惡行於一切種一切因緣  
一切處所有惡行皆不應作云何於一切種不作惡

耶謂由身語意不造衆惡故云何於一切因緣不作  
惡耶謂由貪瞋癡所生諸惡終不造作故云何於一  
切處所作惡耶謂依有情事處及非有情事處不  
造衆惡故云何由念正知遠離諸欲謂斷事欲及斷  
煩惱欲故云何斷事欲謂如有一於如來所證正法  
毗柰耶中得清淨信了知居家迫迕猶如牢獄思求  
出離廣說乃至由正信心捨離家法趣入非家然於  
欲貪猶未永離如是名爲斷除事欲云何斷煩惱欲  
謂彼既出家已爲令欲貪無餘斷故往趣曠野山林  
安居邊際臥具或住阿練若處乃至或在空閑靜室

論  
聖位即地論卷之二  
於諸事欲所起一切煩惱欲攝妄分別貪爲對治故  
修四念住或復還出依近聚落村邑而住善護其身  
善守諸根善住正念而入聚落或復村邑遊行旋反  
去來進止恒住正知爲解睡眠及諸勞倦彼卽於是  
四念住中善安正念爲依止故爲欲永斷欲貪隨眠  
修習對治又卽以彼正知而住爲依止故遠離諸蓋  
身心調暢有所堪能熾然方便修斷寂靜彼由如是  
念及正知爲依止故便能證得煩惱欲斷遠離諸欲  
乃至於初靜慮具足而住如是能於受用欲樂行邊  
劣鄙穢性諸異生法若斷若知何等名爲引無義苦

謂如有一若諸沙門或婆羅門行自苦行於現法中  
以種種苦自逼自切周徧燒惱自謂我今由現法苦  
所逼惱故解脫當苦雖求是事而自煎逼彼於此事  
終不能得然更招集大損惱事如是名爲引無義苦  
諸聖弟子能於如是受用自苦行邊能引非聖無義  
苦法善了知已遠而避之不親不近亦不承事復次  
今當略辯上所說義云何略辯謂諸有情有二種滿  
一增上生滿二決定勝滿增上生滿者謂往善趣決  
定勝滿者謂愛盡離欲寂滅涅槃於此二滿及與障  
礙能斷能證是名略義若於一切種一切因緣一切

處所不作惡行彼便能斷增上生滿所有障礙亦能  
證得增上生滿若於受用欲樂行邊及於受用自苦  
行邊決定遠離彼便能決定勝滿所有障礙亦能證  
得決定勝滿當知是名此中略義

應說想衆生 依應說安住 不了知應說

而招集生死 若了知應說 於說者無慮

由無有此故 他不應譏論 若計等勝劣

彼還興諍論 於三種無動 等勝劣皆無

斷名色愛慢 無著煙寂靜 無惱希不見

此彼天人世

此四頌中初言應說者謂一切有爲法所以者何諸  
有爲法皆三種言事之所攝故今此義中說妙五欲  
以爲應說又妙五欲諸餘沙門婆羅門等從施主邊  
以言求索故名應說又諸君主於妙五欲從僕使等  
以言呼名而受用之由是因緣亦名應說又諸受欲  
者於妙五欲不能自然善知過患唯除諸佛及佛弟  
子爲其宣說彼過患已乃能了知由是因緣亦名應  
說諸受欲者於諸欲中不正思惟而取其相亦取隨  
好卽於彼欲便生愛染受用耽嗜乃至堅著又於諸  
欲不如實知有衆過患所謂諸欲無常虛僞空無有

論  
瑜伽師地論卷十  
實敗壞之法猶如幻事誑惑愚夫甚少愛味多諸過  
患亦不如實了知如是少味多患諸欲出離所謂於  
彼欲貪調伏乃至超越是其出離彼既如是不見過  
患不知出離而受諸欲由是因緣便於欲界生於根  
本所有諸行深起樂著又復造作生爲根本所有業  
已受欲界生生已死滅生已殞歿如是故言應說想  
衆生依應說安住不了知應說而招集生死若遇善  
士得聞正法如理作意則於諸欲如實了知過患出  
離所謂諸欲無常虛僞廣說乃至欲貪超越彼於如  
來所證正法毗柰耶中得清淨信便於諸欲深見過

患轉復增勝遂能捨離若少若多財寶庫藏眷屬遊  
從以正信心捨離家法趣於非家所謂一切生老病  
死皆悉永滅如是出家無所願求修行梵行謂我由  
此持戒精進修梵行故當得生天或異天處彼無如  
是邪祈願故於已不見不恐不慮他所譏論謂他不  
應如是譏論怨尤訶責告言賢首汝今何爲成就感  
年捨現妙欲不隨親戚之所願樂而更希求待時諸  
欲誓修梵行耶如是故言若了知應說於說者無慮  
由無有此故他不應譏論此卽成就清淨尸羅及清  
淨見何以故由見顛倒發起於慢所持故與餘沙門

婆羅門等共興諍論由此因緣說如是見爲諍根本  
若有沙門或婆羅門依等勝劣諍根本見心現高舉  
由此因緣遂與餘沙門婆羅門等遮相諍論依止我  
勝我等我劣三種慢類立已爲勝或等或劣若聖弟  
子非我我所我慢所動乃至亦非我當非有想非無  
想所動了知諸行皆衆緣生於諸行中唯見法性尚  
不以已校量於他爲勝等劣況起見慢而興諍論彼  
聖弟子雖於他所顯揚自宗摧伏他論然於諸法唯  
爲法性緣於慈悲謂當云何若有於我所說妙義一  
句領解如是如是正修行者令彼長夜獲得大義利

益安樂亦令如來正法久住不依見慢及爲利養恭  
敬因緣而興諍論如是不爲希求現法諸妙欲故誓  
修梵行彼由如是修梵行故遠離邪願及諸邪見棄  
捨貪求利養恭敬於一切種皆得清淨輝光熾然無  
不普燭諸天人唯當讚美不應譏論又能超度生  
老病死如是故言若計勝等劣彼遂興諍論於三種  
無動等勝劣皆無言名色者謂五取蘊若有於彼觀  
見爲苦當諦現觀於五取蘊盡見苦時於五取蘊所  
有貪愛由意樂故皆說爲斷非隨眠故彼若卽如已  
所得道轉更修習於其我慢無餘斷滅成阿羅漢諸

論  
淨修階級論卷一  
漏永盡由已證得阿羅漢果心善解脫便於自身自  
身衆具纏及隨眠皆悉永斷離愛離憍離諸放逸彼  
由如是離愛離憍離放逸故名煙寂靜無有燒惱亦  
無希望云何名爲煙寂靜耶煙名爲愛何以故如世  
間煙是火前相能損眼根便爲擾亂今不安住愛亦  
如是是貪瞋癡火之前相能損慧眼亂心相續謂能  
引發無義尋思彼於此愛已斷已知乃至令其於當  
來世成不生法名煙寂靜彼既如是煙靜離著雖復  
追求命緣衆具非不追求然能解脫貪愛追求所求  
無染云何無惱謂彼如是現追求時若他自施或勸

餘施施時殷重非不殷重精而非麤多而非少速而  
非緩然不愛味於所得物無染受用不生耽吝乃至  
堅著如是受用命資具時不爲貪惱之所燒惱若彼  
施主自不能施或障餘施設有所施現不殷重不現  
殷重乃至遲緩而不急速然不嫌恨由此因緣不生  
患惱又於受用所得物時不感不念無損害心及瞋  
患心如是不爲瞋惱所惱又於所得若精若麤於受  
用時深見過患善知出離安住正念遠離愚癡如是不  
爲癡惱所惱云何無希望名希望繫心有在彼不  
驚畏內懷貪願往趣居家謂刹帝利大宗葉家或婆

羅門長者居士大宗葉家我當從彼獲得上妙應所  
噉食乃至財寶衣服餽膳諸坐臥具病緣醫藥供身  
什物如是追求及與受用於此財物都無希望又彼  
恒常安住死想謂過夜分入晝分中復過晝分還入  
夜分於其中間我有無量應死因緣如經廣說所謂  
發風乃至非人之所恐怖由此因緣所爲追求所爲  
受用所有財物於此壽命亦無希望如是無著煙寂  
靜無燒惱無希望故於此天人帝釋自在世主天等  
所有因中都不可見於彼天人諸因果中亦不可見  
又於此四洲天人世間及彼餘處都不可見又於此

世界天人世間及彼餘處都不可見如是故言斷名  
色愛慢無著煙寂靜無惱希不見此彼天人世復次  
初頌顯示待時諸欲於欲邪行及邪行果第二頌中  
顯示捨欲應正道理淨修梵行仍被譏論不應道理  
及待時欲如第二頌第三亦爾第四頌中世尊顯示  
現所證法永離熾然乃至智者內自所證又初頌中  
宣說諸欲是應說相顯待時欲由彼諸欲非纔須時  
卽便稱遂要以言說爲先然後追求受用又顯於彼  
由想安住不了知故起於邪行及招生死邪行果報  
第二頌中顯於諸欲能了知故離邪願故修梵行故

論

佛智地論卷十七

世

子



論  
雜物師地論卷十七  
離邪見故離見根本我慢種故遠離耽著利養恭敬  
故棄捨諸欲應正道理由此因緣他所譏論不應道  
理又顯諸欲是待時性所以者何若於先世不作福  
者今雖用功於所樂欲不能果遂或唯今世造作福  
者卽於此時其所樂欲亦不諧偶由此因緣後方成  
辦所以諸欲名曰待時第四頌中顯示見斷煩惱斷  
故卽於現在證初沙門及沙門果又修所斷煩惱斷  
故卽於現在證後沙門及沙門果斷貪愛故斷我慢  
故如是顯示現所證法又離著故煙寂靜故顯示永  
離熾然及至智者自內所證彼得如是內所證法云

何令他當得了知由無燒惱無所希望相所表故此  
中前三頌顯示世尊爲諸天說苾芻不能顯揚如來  
聖教大義而我獨能說是語時彼旣領悟於苾芻所  
生陵懣心及於自身心生憍慢皆得除滅第四頌中  
廣顯如來聖教大義

欲貪所摧蔽	我心徧燒然	唯大仙哀愍
爲說令寂靜	由汝想顛倒	令心徧燒然
是故常遠離	引貪淨妙相	汝當修不淨
常定於一境	爲貪火速滅	數數應澆灌
觀非妙諸行	爲苦爲無我	亦繫念於身

多修習厭離 修習於無相 壞慢及隨眠

由於慢現觀 當證苦邊際

云何想顛倒謂於不淨境捨不淨相不正思惟取淨妙相及取隨好云何遠離引貪淨相謂如有一見少盛色應可愛樂諸母邑已便攝諸根而不隨念云何常定一境修習不淨謂如有一先以巧便取於賢善三摩地相所謂清瘀乃至白骨或骨瑣相卽以此相於現所得可愛境界繫念思惟如前所取後亦如是又於內身或自或他觀察種種不淨充滿謂此身中有髮有爪乃至便利種種不淨云何觀察非妙諸行

以之爲苦謂如有一作是思惟見少盛色應可愛樂諸母邑已所生貪愛受用希望卽是集諦爲衆苦因由此故生生已老死愁歎憂苦種種擾惱從此而生云何觀察非妙諸行以爲無我謂如有一作是思惟於我身形女身形中都無有我及有情等誰能受用誰所受用唯是諸行唯是諸法從衆緣生云何繫念於身多修厭離謂如有一性是猛盛欲貪種類由是猛盛欲貪類故雖攝諸根然被貪欲損壞其心雖復作意思惟不淨苦及無我亦爲欲貪損壞其心由此因緣彼依不淨或苦無我作意思惟權時厭毀違逆

論  
不順於身念住繫念在前親近修習若多修習彼由  
多住如是行故便能斷此猛盛欲貪若攝諸根不爲  
欲貪損壞其心若復作意思惟不淨苦及無我亦不  
貪欲損壞其心彼由修習如是行故諸欲貪纏但現  
行斷非隨眠斷又此欲貪纏及隨眠略於二種補特  
伽羅相續可得一於異生相續可得二於有學相續  
可得雖有一分有學身中亦不可得然於下貪由永  
斷故已得安隱上貪未斷不得安隱無學身中中界  
妙界所有欲貪尚不可得何況劣界以無學者下上  
貪斷於一切分已得安隱了知是已未離欲貪一分

學者於後無學心生願樂見般涅槃寂靜功德不復  
思惟一切相故恒正思惟無相界故於無相定勤修  
學故又卽於此多修習故永斷三界修斷我慢由此  
斷故說名無學離三界欲上下貪斷已得安隱一切  
苦因皆捨離故證得一切衆苦邊際如是故言修習  
於無相壞慢及隨眠由於慢現觀當證苦邊際復次  
今當略辯上所說義謂顯貪欲由是而生由是寂靜  
及彼寂靜當知是名此中略義云何貪欲由是而生  
謂五因故一由淨妙想二由欣樂樂三由有情想四  
由猛盛貪五由隨眠有餘未盡云何欲貪生已由是



寂靜謂五因故一由作意思惟不淨二由作意思惟  
於苦三由作意思惟無我四由繫念多修厭離五由  
隨眠無餘永滅云何寂靜謂此寂靜略有二種一者  
現行寂靜二者永斷隨眠當來不起由前四種寂靜  
因緣成初寂靜由第五因第二成就

云何苾芻多所住

越五暴流當度六

云何定者能度廣

欲愛而未得腰舟

身輕安心善解脫

無作繫念不傾動

了法修習無尋定

憤愛昏沉過解脫

如是苾芻多所住

越五暴流當度六

如是定者能度廣

欲愛而未得腰舟

此因天女所問伽他暴流有六謂眼暴流能見諸色  
乃至意暴流能了諸法佛聖弟子有學見迹於隨順  
喜眼所識色不住於愛於隨順憂眼所識色不住於  
恚於隨順捨眼所識色數數思擇安住於捨彼設已  
生或欲貪纏或瞋恚纏或愚癡纏三身為緣所謂喜  
身憂身捨身而不堅著乃至變吐由是因緣於屬三  
身諸煩惱纏得不現行輕安而住如是名為得身輕  
安而未得心善解脫由彼隨眠未永斷故彼於後  
時又能永斷屬彼隨眠卽於屬彼諸煩惱中遠離隨

縛如是乃名卽於三身貪瞋癡所心善解脫如於眼  
所識色乃至於身所識觸當知亦爾如是已斷五下  
分結越五暴流謂越眼暴流能見諸色乃至越身暴  
流能覺諸觸如是越度五暴流已餘有第六意暴流  
在爲當越度復修無作無動繫念云何無作謂於涅  
槃心生願樂不爲我慢之所傾動無所思惟亦無造  
作又不爲彼計我我所當來是有乃至我當非想非  
非想等之所傾動無所思惟亦無造作云何無動謂  
不爲彼上分諸結纏繞其心無動無變亦無改轉又  
於隨一寂靜諸定不生愛味戀慕堅著云何繫念謂

爲斷彼上分諸結於其內身住循身觀如是乃至廣  
說念住彼由如是修無作故斷諸生愛修無動故斷  
諸定愛此離現行說名爲斷修繫念故爲令一切上  
分諸結無餘永斷修習對治如是修習無作繫念不  
傾動故能令一切上分諸結無餘永斷是名越度第  
六暴流謂意暴流能了諸法復有差別云何無動言  
無動者是慈善根無瞋性故由此因緣諸聖弟子於  
薩迦耶斷除邪願修奢摩他毗鉢舍那由彼慈故修  
奢摩他由念住故修毗鉢舍那如是正修行者於能  
隨順斷上分結三心修習速得圓滿謂於上身無耽

染心於下有情無憤恚心不放逸者於上下境無染  
汙心餘如前說如是名爲越五暴流當度第六云何  
了法謂於苦法能了能觀於集滅道法能了能觀云  
何修習於無尋定謂能了知如是法已又復安住居  
家諸欲依持斷滅及棄出中或於阿練若處或於樹  
下空閑於隨順喜眼所識色所有喜身於隨順憂眼  
所識色所有憂身於隨順捨眼所識色所有捨身於  
此所緣無欲尋纏心多安住乃至亦無所生家世相  
應尋纏心多安住設起欲尋乃至家世相應尋等卽  
能如實了知出離不爲欲尋之所障礙乃至不爲家

世相應尋所障礙而能靜慮審慮諦慮由此方便由  
此道修能斷喜身染愛過失能斷憂身憤恚過失能  
斷捨身昏沉過失諸纏斷故身得輕安隨眠斷故於  
欲界繫三身染汙心善解脫彼於爾時名已越度廣  
大欲愛謂於諸色乃至諸觸徧流行愛若和合愛若  
增長愛若不離愛若不合愛若退減愛若別離愛或  
於欲界復受生愛復有差別云何修習於無尋定謂  
已得無尋無伺靜慮餘如前說復次今當略辯上所  
說義謂彼天女略問世尊三種要義一者下分結斷  
二者上分結斷方便三者卽彼下分結斷方便及如

彼善斷如是問已爾時世尊隨應而答謂由身輕安  
心善解脫答彼所問下分結斷非斷方便由無作繫  
念不傾動答彼所問上分結斷方便非斷而於彼斷  
天女類前亦卽領解唯餘下分結斷方便及如彼善  
斷爾時世尊先以修無尋定廣說差別答斷方便謂  
若能斷如斷所斷此中了法說名能斷修無尋定說  
名如斷所斷憤過謂瞋恚品所斷愛過謂貪欲品所  
斷昏沉過謂愚癡品如是名爲能如所斷如是廣答  
斷方便已唯有所餘如善斷在復由第二修無尋定  
差別因緣答其善斷言善斷者謂畢竟斷遠分斷一

切雜染斷由了知法故釋畢竟斷由修無尋定故釋  
遠分斷由貪瞋癡纏及隨眠一切斷故釋一切雜染  
斷當知是名此中略義又彼天女依諸有學未得勝  
意已離欲貪未離上貪而興請問意名腰舟如經說  
慙軸意腰舟於此腰舟猶未得者說彼名爲未得腰  
舟此中何等名爲腰舟謂於諸結善解脫心

常有怖世間 衆生恒所厭 於未生衆苦

或復已生中 若有少無怖 今請爲我說

天我觀解脫 不離智精進 不離攝諸根

不離一切捨 我觀極久遠 梵志般涅槃

已過諸恐怖 超世間貪著

今此頌中始從欲界乃至有頂諸薩迦耶皆名世間  
此中義者意在欲界有樂有苦有情世間若諸有情  
十資身具之所攝養無所匱乏身康無病年未衰老  
名爲有樂有情世間與此相違當知有苦有情世間  
世間衆生少分有樂多分有苦諸有有樂有情世間  
常懷恐怖勿我財寶王所侵奪廣說乃至勿由此緣  
遭諸苦難勿或風熱於內發動乃至或人或非人等  
侵損我耶如是懼慮未來財寶變壞之苦及身壞苦  
心常怖畏諸有有苦有情世間現爲衆苦逼切身心

有苦有憂有愁有箭有諸擾惱恒不安住如是故言  
常有衆苦世間衆生恒所厭於未生衆苦或復已生  
中由是因緣彼天現見諸有有樂有情世間樂非決  
定請問如來有決定樂無怖畏處爾時世尊卽爲彼  
天方便示現唯聖教中有如是處非諸外道謂如有  
一住正法外所有沙門或婆羅門於現法中及當來  
世諸欲過患不如實知由不知故希求未來諸欲差  
別捨現法欲求後法欲精勤受學所有禁戒雖復安  
住如是禁戒然無智慧不護根門不守正念無常委  
念乃至廣說彼不調攝諸根門故於他所惠少小利

養及與恭敬尚生愛味隨起戀著何況廣大如是精  
勤受禁戒者遠離智慧密護根門於現法欲尚不能  
斷況後法欲又卽於彼有一沙門若婆羅門於欲過  
患羸了知故能越現法後法諸欲而復欣求上離欲  
地於非解脫起解脫想斷棄諸欲便臻遠離彼由精  
勤數多修習正思惟故離欲欲界乃至離欲無所有  
處由此因緣捨下自體愛上自體由愛彼故於當來  
世尚不解脫下地自體何況上地如是棄捨財寶自  
體迷失道者雖復安住勇猛精勤而不能得一向快  
樂無怖畏處何以故彼外道師尚於是處不見不識

況能爲彼諸弟子等當廣開示如是外道師及弟子  
所制論中決定無有衆苦邊際與此相違善說正法  
毗柰耶中當知具足一切義利乃至定有衆苦邊際  
依此密意佛爲彼天說如是言天我觀解脫不離智  
精進不離攝諸根不離一切捨復次今當略辯上所  
說義謂爲顯示惡說邪法毗柰耶中師及弟子皆有  
衰損善說正法毗柰耶中皆具吉祥於一切苦能證  
邊際當知是名此中略義爾時彼天聞佛世尊答所  
請問歡喜踊躍卽以四種無上功德讚歎如來謂佛  
世尊難出現故出已能成利他行故亦能建立自利

德故於自他利離染心故我觀極久遠梵志般涅槃者此讚世尊難出現德已過諸怨者此讚世尊利他行德已過諸怖者此讚世尊建自利德超世間貪欲者此讚世尊於自他利離染心德如是四種功德差別當知復有三種差別謂難出現故難可見故建立自利利他行故見者則能成就大義成大義者離染心故徧一切生亦無衆罪如是衆德諸佛世尊最爲殊勝故以此相讚歎如來

瑜伽師地論卷第十七

音釋

詭

居洧切  
詐也

餽膳

餽胡交切  
膳時戰切

明政南京都察院都事金壇善雲居士于明照  
遺銀帶一圍刻此  
長洲徐普書 建陽鄒友刻  
萬曆己亥春三月徑山寂照庵識



瑜伽師地論卷第十七

瑜伽師地論卷十七

二十三

三十七

瑜伽師地論卷第十八

彌勒菩薩說

唐三藏沙門玄奘奉詔譯

本地分中思所成地第十一之三

誰獎勝類生 及開出離道 於何住何學

不懼後世死 戒慧自熏修 具定念正直

斷諸愁熾然 正念心解脫 能獎勝類生

及開出離道 住此於此學 不懼後世死

今此頌中言勝類者即是四種勝上姓類一婆羅門

二刹帝利三吠舍四戍達羅以法以正以制以導教

論

瑜伽師地論卷十八

勝類生故名爲獎此中顯示唯佛世尊能以法以正以制以導教勝類生由此因緣世尊自顯唯我獨爲真獎導者故爲彼天作如是說具戒具慧以自熏修又唯世尊能爲四種勝上類生宣說出離一切衆苦聖入支道此中世尊亦自顯示是真說者云何具戒謂佛世尊昔菩薩時棄上妙欲捨離居家受持身語所有律儀云何具慧謂卽於彼受持身語律儀住者起如是相內正思惟深心籌量審諦觀察今此世間多遭難苦所謂若生若老如經廣說云何自熏修謂於往昔無量餘生經三大劫阿僧企耶於六波羅蜜

多修習善修習由彼因緣今無師自然心趣出離又於衆緣所生諸行以微妙智能隨悟入云何具定謂能乃至離無所有處欲證得非想非非想處云何具念謂依如是所得勝定爲斷見斷諸煩惱故修四念住卽以如是我所修念住爲其導首乃至修習三十七種菩提法分云何正直謂彼生起逆流正直聖八支道能斷見斷所有煩惱於逆流道得預隨流云何永斷一切愁憂熾然謂從諦現觀俱得成不還者又能永斷五下分結瞋恚似順愁憂貪欲似順熾然於如是等皆已永斷云何正念謂爲永斷上分諸結復更

修習四種念住乃至修習三十七種菩提分法云何  
心解脫謂已永斷上分結故於二種障心普解脫謂  
煩惱障及所知障其心如是善解脫故得成如來應  
正等覺廣說如經由此故能獎勝類生開出離道諸  
有四種勝類隨一於此聖教愛樂正行爲欲證得聖  
八支道於三學中勤修學者彼定能證聖八支道及  
涅槃果由證彼故不懼當來生老病死復次今當略  
辯上所說義謂略顯示唯佛世尊能令四類速得清  
淨彼若於此能正修行不唐捐故又復示現如來聖  
教善說正法及毗柰耶又復示現佛是天人無上大

師當知是名此中略義

云何檀名譽

云何具珍財

云何獲美稱

云何攝親友

持戒檀名譽

布施具珍財

誦實獲美稱

惠捨攝親友

云何持戒能檀名譽謂如有一或男或女具足尸羅  
及賢善法乃至命終斷除殺罪遠離殺生如經廣說  
乃至十方所有沙門婆羅門等常所稱歎由是因緣  
爲諸國王羣臣長者乃至城邑聚落人民恭敬供養  
云何布施能具珍財謂如有一昔餘生中作及增長  
施福業事由此因緣今生巨富大財寶家乃至衆多

府庫盈積云何諦實能獲美稱謂如有一不以假僞  
斗稱函等詭誑陵慢妄言等事而致財寶但以如法  
作業技能依法不暴而致財寶彼既如是衆咸唱言  
賢哉儒士乃能如法作業技能引致財寶云何惠捨  
能攝親友謂如有一現前多有種種家產遠離怪垢  
不吝資具以正安樂而自歡娛乃至友朋親戚者長  
彼諸人等便相佐助引致財寶守護滋息復次今當  
略辯上所說義謂略顯示恭敬利養二種因緣持戒  
檀名譽者顯恭敬因緣所餘諸句顯利養因緣謂因  
力故士用力故助伴力故當知是名此中略義

齊何泉止息

於何徑不通

世間諸苦樂

何處無餘滅

若於是處所

眼耳及與鼻

舌身意名色

永滅盡無餘

齊此泉止息

於斯徑不通

世間諸苦樂

是處無餘滅

云何爲泉謂六觸處何以故譬如泉池能生諸水水  
所繫屬堪任觸用又能存養男女大小下及禽獸乃  
至一切未盡枯竭六內觸處亦復如是一切愚夫六  
境界觸之所觸用又能存養乃至是中諸貪愛水未  
盡枯竭云何爲徑徑有二種一煩惱徑二者業徑此  
中徑者意明因義云何苦樂謂或於現法六種觸處

爲緣所生或安受受所攝或不安受受所攝或於後  
法煩惱攝持妙行惡行爲緣所生或安受受所攝或  
不安受受所攝於何處所如是六處及名色等無餘  
滅盡謂無餘依涅槃界中若諸異生泉徑苦樂一切  
無缺亦未有捨若諸有學缺而未捨若諸無學徑及  
當來所有苦樂亦缺亦捨不復現行泉及現法所有  
苦樂亦缺亦捨有餘依故猶復現行是故無餘涅槃  
界中說彼一切無餘盡滅復次今當略辯上所說義  
謂略顯示於現法中因及苦樂於後法中因及苦樂  
於無餘依涅槃界中皆悉永滅當知是名此中略義

誰能越暴流

誰能超大海

誰能捨衆苦

誰能得清淨

正信越暴流

無逸超大海

精進捨衆苦

智慧得清淨

今此頌中云何正信能越暴流謂如有一爲欲了知  
諸欲過患聽佛所說若弟子說所有正法聞是法已  
獲得正信便生欲樂爲斷事欲及煩惱欲遂能棄捨  
居家事欲正信出家往趣非家旣出家已爲欲斷除  
煩惱諸欲遠離而住彼由熾然勤精進故乃至修習  
正思惟故斷煩惱諸欲得離欲定地如是正信爲依  
爲導便能越度諸欲暴流云何無逸能超大海謂於

彼定終不愛味乃至亦無堅著安住唯除爲證諸漏  
盡智專注其心由此定心清淨鮮白正直調柔於四  
聖諦能入現觀乃至證得諸漏永盡如是由不放逸  
爲依爲導能斷色無色繫二有暴流及斷一切無明  
與見二種暴流是故名爲超渡大海云何精進能捨  
衆苦謂如有一有學見迹作是思惟我應當證三界  
離欲諸結永盡便臻遠離於彼勇猛精勤而住不多  
安止貪欲纏心又能如實了知現在諸欲貪纏所有  
出離於貪欲蓋淨修其心遂能斷滅諸貪欲纏及貪  
欲纏爲緣所生心諸憂苦如貪欲蓋乃至疑蓋當知  
亦爾如是精進爲依爲導能捨衆苦云何智慧能得  
清淨謂彼除滅能染汙心乃至能障究竟涅槃五種  
蓋已卽依未至安住未至如先所得苦集滅道諸無  
漏智於諸苦中思惟真苦乃至於道思惟真道便得  
無餘三界離欲諸漏永盡如是由先所得智慧爲依  
爲導能證清淨復次今當略辯上所說義謂薄伽梵  
於此頌中略顯異生先已離欲後於聖諦現觀清淨  
及顯有學於諸聖諦現觀爲先離欲清淨當知是名  
此中略義

誰超越暴流 晝夜無昏昧 於無攀無住

甚深無減劣 圓滿衆尸羅 具慧善安定

內思惟繫念 能度極難度 諸欲想離染

亦超色界結 彼無攀無住 甚深無減劣

今此頌中云何暴流所謂四流欲流有流見流無明流云何無攀無住所謂諸愛永盡離欲寂滅涅槃及滅盡定所以者何所言攀者諸煩惱纏所言住者煩惱隨眠於彼處所二種俱無是故說言無攀無住此謂涅槃無攀無住又想名攀受名爲住若於是處二種俱無卽說彼處無攀無住如是顯示滅受想定無攀無住今此義中意取滅定云何圓滿衆尸羅謂善

安住身語律儀修治淨命云何具慧謂於苦聖諦如實了知乃至於道聖諦亦復如是云何善安定謂遠離諸欲乃至具足安住第四靜慮或第一有三摩鉢底云何內思惟謂於二十二處數數觀察言我今者容飾改常去俗形好廣說如經云何繫念謂於二十二處數觀察時依沙門想恒作恒轉而現在前由此因緣爲斷餘結修四念住云何能度極難度謂一切結無餘斷故能度最極難度有頂彼非一切愚夫異生可能度故云何於諸欲想而得離染謂於下分諸結已斷已知云何超於色界諸結謂於色繫上分諸

結已斷已知云何於無攀無住甚深中無有減劣謂於無色界或已離欲或未離欲已得非想非非想處堪能有力入滅盡定學與無學俱容有此故不定言超無色結復次今當略辯上所說義謂薄伽梵於此頌中略顯能得最究竟道及顯能證第一住道當知是名此中略義

貪恚何因緣 由何故欣感 毛豎意尋思

如孩依乳母 潤所生自生 如諾瞿陀樹

別縛於諸欲 猶摩迦處林 是貪恚因緣

由斯故欣感 毛豎意尋思 如孩依乳母

知彼彼因緣 生已尋除滅 超昔未超海

暴流無後有

今此頌中云何貪恚謂如有一處在居家於可意境可意有情共相會遇而生貪著於不可意境及有情共相會遇而生瞋恚云何欣感謂如有一於佛所證法毗柰耶率爾得生須臾正信不善觀察前後得失忽然自勵便棄家法往趣非家既出家已與凡道俗共相雜住遂於去來貨財親友追念思慕憂感纏心或復有一非由正信亦非自勵往趣非家然或爲王之所驅迫乃至或爲不活邪畏之所恐怖捨離居家

既出家已於其正信諸婆羅門居士等邊時時多獲  
利養恭敬深生愛味竊作念言吾此一方善哉竒要  
無勞稼穡不事商賈少致艱辛足堪活命彼緣如是  
利養恭敬便自欣悅安然而住云何毛豎及意尋思  
謂如有一非由自勵不爲活命捨離居家然由正信  
捐棄家法往趣非家既出家已不與道俗共相雜住  
便臻遠離寂靜閑居彼閑居時或於塵霧或昏夜分  
見大雲氣聞震雷音或逢電雨師子虎豹或遭兇猾  
竊劫抄虜或遇非人來相燒逼便生驚怖身毛爲豎  
或至晝分於彼去來竒妙親友發依耽嗜所有尋思

謂欲尋思如經廣說乃至家世相應尋思如是已說  
貪恚等事云何潤生及與自生猶如世間諾瞿陀樹  
潤名愛水由此爲緣能生諸取彼貪恚等一切皆用  
此爲共緣自者卽是貪恚爲先尋思爲後各各差別  
種子界性云何貪恚乃至尋思別縛諸欲猶如世間  
摩魯迦條纏繞林樹謂略說有六種別欲或有身手  
力所引致現在事欲謂居家者所有諸欲於此境界  
用此爲緣發生貪恚或有從他所得種種現在事欲  
謂爲活命而出家者所有諸欲於此境界用此爲緣  
發生欣悅或有過去未來事欲謂忽自勵而出家者

所有諸欲於此境界用此爲緣發生憂感或有所餘  
諸煩惱欲略有二種謂於欲界自體及資身命或有  
未斷妄分別貪謂由正信而出家者寂靜閑居於永  
夜分所遭衆事於此境界用此爲緣便生驚怖身毛  
爲豎或有未斷妄分別貪所謂卽此補特伽羅至晝  
日分於外色聲香味觸境用此爲緣發生意地所有  
尋思又有沙門若婆羅門如實了知如前所說貪與  
恚等及彼因緣又能了知衆緣生法無常性已隨其  
所生不起貪著卽便棄捨變吐斷滅離色無色二界  
貪故度有暴流離欲貪故度欲暴流如是暴流昔所

未度今旣度已終無有退復次今當略辯上所說義  
謂薄伽梵於此頌中略顯三位一在家位二出家位  
三遠離位又略顯示共與不共因緣所生若愛若恚  
於諸欲中二種別縛及斷方便并斷勝利當知是名  
此中略義又於此中若貪若欣若依耽嗜所有尋思  
當知愛品若恚若感及與驚怖當知恚品

應作婆羅門 謂斷無縱逸 永棄捨諸欲

不希望此有 若更有所作 非眞婆羅門

當知婆羅門 於所作已辦 諸身分劬勞

未極底未度 已得度住陸 無動到彼岸

天汝今當知 此喻真梵志 謂永盡諸漏  
得常安靜慮 彼永斷一切 愁憂及熾然  
恒住於正念 亦常心解脫

今此頌中顯示彼天依於世俗諸婆羅門爲世尊說  
謂有種姓諸婆羅門自號我爲真實梵志計梵世間  
爲最究竟希求梵世安住於色常勤精進心無懈倦  
恒樂遠離寂靜閑居減省睡眠修習靜定爲斷事欲  
及煩惱欲由彼種姓諸婆羅門計梵世間以爲究竟  
希望梵世不求欲有又顯如來依第一義諸婆羅門  
而報彼天若婆羅門所作已數復應作更有勝上

所應作事當知此非真婆羅門若婆羅門證婆羅門  
所應作事超登一切薩迦耶岸安住陸地當知此是  
真婆羅門由此顯示學與無學皆婆羅門學有二種  
謂於欲界或未離欲或已離欲未離欲者未得源底  
未到彼岸於二種法猶未具足一未得內心勝奢摩  
他二雖已得增上慧法毗鉢舍那未善清淨由闕內  
心奢摩他故乘如所得聖道浮囊爲證內心奢摩他  
故運動如是勇猛精進又復爲令增上慧法毗鉢舍  
那善清淨故運動如手勇猛精進彼於如是勤精進  
時離欲界欲如得源底證阿羅漢如到彼岸已離欲

者證得內心勝奢摩他亦得善淨毗鉢舍那唯爲  
斷上分諸結發勤精進非諸身分若已越度成阿羅  
漢所作已辦離勤功用名住陸地已到彼岸此則顯  
示諸婆羅門依第一義略有三種二是有學一是無  
學若已究竟到於彼岸諸婆羅門名永盡漏若未離  
欲一切身分勤精進者名得常委若已離欲得源底  
者名得靜慮得靜慮者永斷一切下分結故已斷貪  
欲及瞋恚品所有一切愁憂熾然永盡漏者永斷修  
斷諸煩惱故已善修習四種念住恒住正念及心解  
脫彼非作已數數更作亦無增勝所應作事是故說

彼名第一義真婆羅門苾芻苾芻度暴流耶告言如  
是天無攀無住已度暴流耶告言如是天苾芻汝今  
猶如何等無攀無住已度暴流如我劬勞如是如  
是劣如我劣已如是如是住如我住已如是如  
是漂

天我如如捨劬勞

如是如是無減劣

如是廣說鮮白品

此中祇餒頌應知

今此頌中無攀無住者謂涅槃滅定如前已說世尊  
依昔示現修習菩薩行時所有最極難行苦行非方  
便攝勇猛精進又依示現坐菩提座非方便攝勇猛

精進斷徧知故說如是言天汝當知我昔如如虛設  
劬勞如是如是我便減劣如如減劣如是如是我便  
止住如如止住如是如是又被漂溺與此相違應知  
白品此中顯示修苦行時非方便攝勇猛精進名曰  
劬勞行邪方便善法退失名爲減劣既知退失諸善  
法已息邪方便說名止住捨諸苦行更求餘師遂於  
嗚達洛迦阿邏荼等邪所執處隨順觀察故名漂溺  
復於後時坐菩提座棄捨一切非方便攝勇猛精進  
所有善法遂得增長如如善法既增長已如是如是  
於諸善法不生知足不遑止住於所修斷展轉尋求

勝上微妙既由如是不知足故遂不更求餘外道師  
無師自然修三十七菩提分法證得無上正等菩提  
名大覺者此中四義捨劬勞等四句經文如其次第  
配釋應知云何復依涅槃無依無住以顯差別謂不  
能度諸煩惱纏隨眠暴流略由四因何等爲四謂最  
初有依耽嗜尋依耽嗜尋爲依止故便有懈怠又由  
懈怠爲依止故住異生分住異生分爲依止故順生  
死流貪愛勢力令於五趣生死河中順流漂溺與此  
相違四種因故能度暴流如應當知云何復依想受  
滅定以顯差別謂如有一先已證得想受滅定復住

放逸多住想受而不多住諸想受滅由此因緣退失  
滅定由退失故還復止住下地坐因住彼因故心便  
定趣彼所得果與此相違應知白品四句差別

獨臻阿練若 靜慮棄珍財 爲別有方求

爲窺窬封邑 何不與人交 而絕無徒侶

得義心寂靜 摧妙色魔軍 我獨處思惟

受最勝安樂 故不與人交 而絕無徒侶

此因天女所問伽他言得義者略有二種一者證得  
沙門果義二者證得聖神通義由初得義超越一切  
生死大苦第二得義證入解脫寂靜思惟現法樂住

又初得義降伏可愛妙色魔軍第二得義獨處思惟  
受勝安樂此中意辯聖神通義所以者何謂如有一  
爲欲成辦聖神通義爲令解脫清淨圓滿依十徧處  
方便修行由此因緣令徧處定清淨圓滿亦令解脫  
轉得清淨圓滿鮮白亦能成辦聖神通義彼既了知  
此成辦已便自通達我義已辦沙門果義亦得成就  
是真沙門於求財者深修厭毀於諸城邑交遊等處  
了知其初了知過患了知出離亦能了知趣出離行  
生彼因緣說名爲初無常衆苦變壞法性是名過患  
欲貪調伏斷除超越名爲出離聖八支道名趣出行

若有於彼不見其初乃至不見趣出離行由是因緣於具珍財有情等處不能厭毀城邑交遊周旋不絕而謂彼爲心得寂靜於出家證入解脫靜慮定者內心寂靜及生誹謗由是彼於內心寂靜則不堪能善見善知善鑒善達若第一義內心寂靜與此相違則能善見乃至善達復次今當略辯上所說義謂薄伽梵於此略示諸受欲者樂雜住者非第一義內心寂靜若有證得入解脫定離諸愛味名第一義內心寂靜當知是名此中略義

諸行無常

有生滅法

由生滅故

彼寂爲樂

今此頌中蘊及取蘊皆名諸行此中義者意在取蘊是五取蘊略有三種謂去來今諸行無常者謂彼諸行本無而生生已尋滅若過去生過去所得諸自體中所有諸蘊皆過去故已謝滅故生已沒故體是無常若未來生未來所得諸自體中所有諸蘊皆未生故非已起故未滅沒故可生起故是有生法若現在生現在所得諸自體中所有暫住支持存活有情諸蘊皆死法故可爲殞滅之所滅故是有滅法若彼諸蘊在於未來所得自體是有生法於中都無所得自

體是常是恒乃至即當如是正住唯除纔生生已尋  
滅若諸有情於現法中永盡未來諸蘊因者一切未  
來自體諸蘊皆不生故說各彼寂又復此寂由二因  
緣說之爲樂一者一切苦因滅故一切麤重永止息  
故於現法中安樂住故說之爲樂二者當來生老病  
等所有衆苦永解脫故說之爲樂復次今當略辯上  
所說義謂薄伽梵此中略說正見依處及正見果復  
有差別謂略顯示徧知依處及彼斷滅又略顯示所  
徧知法及與徧知又略顯示三世諸行所有雜染及  
彼寂故所有清淨又略顯示諸緣起法及緣起滅又

略顯示苦諦滅諦又略顯示空與無願二解脫門所  
依處所及顯無相一解脫門所依處所又略顯示聖  
諦現觀相違二法斷所依處言二法者一隨順戲論  
二怖無戲論又略顯示不共外道二對治法何等爲  
二一者所知無顛倒性二者所證無顛倒性

無逸不死跡 放逸爲死跡 無逸者不死

縱逸者常死

今此頌中云何無放逸是不死跡耶謂如有一依四  
所依立四種護謂命護力護心雜染護正方便護是  
名不放逸此不放逸爲依爲持涅槃資糧未圓滿者

令速圓滿已圓滿者令於現法得般涅槃云何放逸  
爲死迹耶謂如有一居家白衣於諸欲境耽著受用  
造不善業或有出家現四無護謂命無護乃至正方  
便無護如是放逸通於二品謂在家品及出家品卽  
此放逸爲依爲持樂生本行造生本業因此故生生  
已壽終生已夭没云何無縱逸者不死縱逸者常死  
耶謂死有五種一者調善死二者不調善死三者過  
去死四者現在死五者未來死若善修習此無縱逸  
補特伽羅於現在世由調善死而正死時由過去死  
已死於過去世亦由不調善死於現在世不由不調

善死而死於未來世不由調善死不由不調善死而  
死故名不死若有縱逸補特伽羅於現在世由不調  
善死而正死時於過去世亦由不調善死已死於現  
在世卽由不調善死而死於未來世亦由不調善死  
當死故名常死復次今當略辯上所說義謂薄伽梵  
此中略示無縱逸者道諦滅諦有縱逸者集諦苦諦  
又略顯示處非處性自業作性前半顯示處非處性  
後半顯示自業作性又前半顯示師於弟子作所應  
作後半顯示諸弟子等自所作義

衆生尋思所鑽搖

猛利貪欲隨觀妙

倍增染愛而流轉 便能自爲堅固縛

今此頌中云何尋思之所鑽搖謂如有一於先所得  
先所受用諸欲境界不正作意發生不善依於耽嗜  
諸惡尋思云何猛利貪欲謂如有一於昔餘生修習  
貪欲亦多修習由是因緣令此生中於先所得先所  
受用諸欲境界不正作意而被貪欲散壞其心云何  
隨觀淨妙謂如有一不善護身不攝諸根不住正念  
遊行聚落見甚少年可愛美色諸母邑已便不如理  
取淨妙相由此因緣身心燒惱云何倍增染愛謂由  
五種相貌當知染愛增長何等爲五謂如有一雖於

下劣諸欲境界尚生猛利諸貪欲纏耽著不捨何況  
上妙又以非法多分兇暴積集珍財不以正法亦常  
攝受增上衆具又於輕賤無所用物尚不欲捨何況  
貴重雖爲追求少劣財物尚行衆多身語意惡何況  
多勝又於受持少小妙行其心尚無趣向愛樂何況  
廣大又於涅槃尚不樂聞何況欲得云何堅固縛謂  
由三種相知堅固縛一堅牢故二苦所觸故三長時  
隨逐故於現法中由惡行根貪墮癡故知縛堅牢於  
當來世由生那洛迦徬生鬼趣知苦所觸及長時隨  
逐復次今當略辯上所說義謂略顯示依二失壞因

有二種失壞何等名爲二失壞因謂不正思惟力及  
因力云何名爲二種失壞謂方求失壞及受用失壞  
云何不正思惟力謂墮念先所受用境界因緣所生  
不正思惟或邪分別現前境界因緣所生不正思惟  
或邪取相不正思惟或卽於彼若住若行不正思惟  
云何因力謂於可愛境界宿習欲貪云何方求失壞  
謂如有一成就二種失壞因故以非正法或以兇暴  
追求積集所有邪財云何受用失壞謂如有一於先  
所得順樂順苦順非苦樂諸境界中或有於一生成  
生著廣說乃至不知出離而受用之或有於一發生

憎恚憎恚所蔽或有於一發生愚癡愚癡所蔽彼由  
如是貪染所蔽乃至愚癡之所蔽故行身語意種種  
惡行爲貪瞋癡三堅固縛之所纏縛亦爲那洛迦傍  
生鬼等諸縛所縛又有差別謂愛結所繫補特伽羅  
略有七種雜染當知皆是貪愛所作謂隨念雜染不  
自在雜染境界雜染熱惱雜染善趣相應雜染惡趣  
相應雜染諸見雜染云何隨念雜染謂如有一不正  
隨念先所受用可愛境界希望追求令心散壞云何  
不自在雜染謂如有一宿世串習貪欲法故今世貪  
欲爲性猛利雖復如理於可愛境隨念作意而有希

望追求貪欲散壞其心彼由貪欲極猛利故心不自  
在云何境界雜染謂如有一遊城邑等現前會遇容  
色端嚴可愛境界由彼境界極端嚴故隨美妙相心  
識纏綿因此發生希望追求種種貪愛云何熱惱雜  
染謂如有一由是三種能長貪愛諸雜染故令已貪  
愛展轉增盛追戀過去已受用境希求未來當受用  
境耽著現在正受用境乃令身心周徧熱惱云何善  
趣相應雜染謂卽由彼貪愛集諦增上力故行身語  
意種種妙行得生善趣或天或人彼於樂受耽著不  
捨醉悶而住專行放逸云何惡趣相應雜染謂卽由  
彼貪愛集諦增上力故行身語意種種惡行身壞命  
終墮諸惡趣生那洛迦等於彼生已便爲種種極重  
憂苦惡心憤心之所擾惱云何諸見雜染謂卽由彼  
貪愛集諦增上力故會遇惡友說顛倒法爲令雜染  
得解脫故彼雖希求雜染解脫由遇如是倒說法故  
不證解脫於六十二諸見趣中隨令一種邪見增長  
於諸緣起法愚癡增上故彼由如是見結所繫於五  
趣等生死大海不得解脫

住法具尸羅 有慙言諦實 能保愛自身  
亦令他所愛

今此頌中云何住法謂於如來所證善說正法毗柰耶中淨信出家樂修梵行云何具尸羅謂如是出家如是愛樂故於戒無缺乃至無雜相續而作相續而轉於諸學處能受能學云何有慙謂慙於可慙慙於能生惡不善法謂能順惡戒冗戒因緣卽不正相不正尋思若諸煩惱及隨煩惱云何言諦實謂發露諸惡不藏諸惡若有所犯卽於智者同梵行邊如實自舉如法對治復次今當略辯上所說義謂薄伽梵於此頌中略顯四因所攝尸羅清淨謂能正受故受已不冗故遠離冗因故雖由無知放逸冗已卽便如法

而對治故當知是名此中略義

若見他惡業 能審諦思惟 自身終不爲

由彼業能縛

今此頌中云何見他惡業審諦思惟謂如有一或善男子或善女人爲性聰慧成就如理諦觀法忍見他現行惡行因故便遭種種挫辱楚撻又爲王人執至王所廣說如經乃至斷命見已便作如是思惟觀觀是人於現法中造作如是惡不善業卽於現法還受如是辛楚果報乃至止止如是惡不善業終不應爲終不應作終不應行終不應犯卽彼又見屠羊雞豬

廣說一切不律儀衆不由如是作業技能活命方術而乘象馬車乘輦輿又不因此能致廣大財寶庫藏令不散失然爲世間之所訶毀凡在傭俗尚不以身暫相觸受而遠避之況餘賢哲見已便作如是思惟餘如前說卽彼又見他人巨富饒大財寶然由懶惰多住縱逸經過日夜淹積歲月所有珍財僮僕基業及諸善法漸漸衰退見已便作如是思惟餘如前說卽彼又見種種有情身相差別或有生盲生聾生瘧或瞎或跛或癩或癩或復短壽或惡形色或多疾病或貧賤家或少枝屬或弊惡慧或扇宅迦或半宅迦

或醜形類餘卽不爾見已便作如是思惟觀觀是人先作種種惡不善業今受如是苦惡果報乃至止止如是惡不善業餘如前說卽彼又見他人點慧無有懶惰具足翹勇所謂能作營農商賈行船等業及能正作言論事業彼雖具足如是翹勇所作事業數漸衰損終無成辦見已便作如是思惟餘如前說卽彼又見二人出家趣於非家同修梵行一於衣服飲食等利有所置之一則不爾見已便作如是思惟餘如前說卽彼又見或有國王或是王等大地封疆咸皆克伏堅著不捨但爲一身一具骸骨唯爲現在少小

安樂身語意門現行無量廣大惡行損壞多生多身  
安樂當受多生多身大苦見已便作如是思惟觀觀  
是王或是王等甚爲愚弊唯知保愛一生一身不知  
保愛多生多身唯愛現在少時小樂不愛當來多時  
大樂亦非不愛多生重苦乃至止止如是惡不善業  
終不應爲終不應作終不應行終不應犯復有或善  
男子或善女人爲性聰慧獲得天眼用此天眼見諸  
有情死時生時如經廣說乃至生在大那洛迦中見  
已便作如是思惟觀觀是人於現法中造作如是惡  
不善業令受後法辛楚果報乃至止止如是惡不善

業餘如前說如是或善男子或善女人見他所作諸  
惡業已由四種行諦善思惟諦善觀察何等爲四一  
者觀察或因違越或邪活命或放逸懈怠於現法中  
造作種種惡不善業卽現法受非愛果報二者觀察  
或有有情依身差別或有所作而不果遂或有所求  
而不果遂皆由先造惡不善業故現法中各受如是  
非愛果報三者觀察或有國王或與王等因現法中  
行諸惡業皆知當來定受種種非愛果報四者觀察  
諸有情類死時生時因現法中造作種種惡不善業  
後法中受非愛果報彼由如是如實知故終不自作

云何業縛謂樂諸業故由業重故於業果報不自在  
故樂諸業者謂如有一串習惡故愛樂諸惡由此因  
緣於諸善法心不能入是初業縛由業重者謂如有  
一於無間業或有具造或不具造由此因緣雖有欣  
樂於佛所證善說正法毗柰耶中暫時出家尚不能  
得況當能獲沙門果證如是名爲第二業縛於業果  
報不自在者謂如有一由身語意惡行因緣生諸惡  
趣生彼處已不得自在不能自任長夜受苦或生邊  
地於彼絕無四賢善衆所謂苾芻廣說乃至鄔波斯  
迦如是名爲第三業縛復次今當略辯上所說義謂

薄伽梵於此略示依諸有情業業果報如理思惟及  
顯如理思惟爲先法隨法行當知是名此中略義

### 瑜伽師地論卷第十八

音釋

兇猾

兇許容切惡果也  
猾胡刮切狡猾也

燒逼

燒而沼切亂也  
逼彼側切迫也

鑽搖

鑽祖官切穿也  
搖于嬌切動也

瞎跛

瞎呼轄切目盲也  
跛布火切足偏廢也

丹陽居士賀學易施資刻此  
瑜伽師地論第十八卷 益州沙門性淨對  
長洲徐普書 進賢洪以忠刻  
萬曆己亥春三月徑山窠照庵識

瑜伽師地論卷第十九

彌勒菩薩說

唐三藏沙門玄奘奉詔譯

本地分中思所成地第十一之四

賢聖嘗說最善語

愛非不愛語第二

諦非不諦語第三

法非非法語第四

今此頌中言善語者所謂善說善言善論當知善說有三種相所謂悅意無染唯善由第一語令他慶悅由第二語令自尸羅終無穿缺由第三語能令他人出不善處安住善處因此引攝利益安樂或有愛語



非諦非法謂如有一以美妙言稱讚他人非真實德  
或有諦語非愛非法謂如有一以染汙心發麤惡言  
訶責他人真實過惡或有法語亦愛亦諦謂如有一  
善知稱讚及與訶責知可稱讚可訶責已然不稱讚  
亦不訶責唯善方便爲說正法能令彼人出不善處  
安住善處復次今當略辯上所說義謂薄伽梵此中  
略示所有善語若標若釋當知是名此中略義

信慙戒施法 善人所稱讚 是名趣天道

能往天世間

此頌所明謂如有一於佛所證法毗柰耶獲得正信

恥在居家受持淨戒趣得衣服飲食臥具便生喜足  
減除器物儉約資緣凡所獲得如法利養終無私隱  
必與智人同梵行者而共受用所有正法初中後善  
稱揚梵行所謂契經乃至論議皆能受持研尋究達  
傳授他人廣爲開闡彼既成就是諸善法當知必獲  
三種勝利一者諸佛諸佛弟子真實善人之所稱讚  
二者若彼尸羅財施之所攝引福德資糧法施攝引  
智慧資糧善圓滿者便得趣入證解脫處清淨諸天  
衆同分中三者若彼二種資糧猶未圓滿便能令彼  
速得圓滿身壞已後定生善趣多往天上樂世界中

復有差別謂如有一於佛所證法毗柰耶獲得正信  
信惡尸羅當墮惡趣信慳貪者得貧窮報如是信已  
於現法中惡戒慳貪深生羞恥以羞恥故棄惡尸羅  
受清淨戒棄捨慳貪以無垢心安處居家廣說乃至  
善行布施由此因緣於現法中聖賢所讚身壞已後  
乃至當生善趣天上樂世界中復次今當略辯上所  
說義謂薄伽梵此中略示在家出家二種正行及正  
行果所有勝利當知是名此中略義

多聞能知法 多聞能遠惡 多聞捨無義  
多聞得涅槃

此頌所明謂如有一於依先時正所應作施論戒論  
生天之論無倒教法恭敬聽聞已遂能了知其義  
謂現法中種種惡行及當惡趣苦無義因諸惡行所  
應速遠離及往善趣捨生惡趣苦無義因彼由了知  
如是法義法隨法行能遠苦因能引樂因由此因緣  
得樂捨苦若於增上四聖諦等相應教法恭敬聽聞  
聞已遂能了知其義謂一切有生死大苦寂靜涅槃  
彼由了知如是法義若根已熟資糧已滿便能獲得  
如是義識心清淨故纔聞法已於諸聖諦未現觀者  
能入現觀已現觀者便得漏盡若根未熟資糧未滿

卽由如是遠離諸惡依增上戒起增上心依增上心發增上慧由此能捨一切苦本煩惱無義證得涅槃復次今當略辯上所說義謂薄伽梵此中略示先聞正法如理思惟先如理思法隨法行法隨法行爲先因故得勝利果當知是名此中略義

智者如空無染汗

不動猶如天帝幢

如泛清涼盈滿池

不樂淤泥生死海

今此頌中辯阿羅漢苾芻心善解脫超諸戲論猶如虛空何以故譬如虛空離諸戲論淨與不淨皆不能染諸阿羅漢亦復如是一切世法若順若違皆不能

染所謂利衰乃至苦樂又諸有學已離欲貪向阿羅漢於四念住善住其心修無相心三摩地時如天帝幢於其一切動發橋舉戲論營爲生願俱行所有貪愛不能傾動又諸有學已離欲貪得不還果於上解脫心生欲樂譬如遊泛清冷泉池於愛味定上分諸結熱淤泥中終不欣樂由於此中不欣樂故亦不欣樂生死大海復有差別謂阿羅漢所有飲食言說遊行處無相住有餘依苦之所隨逐如其次第三處應知復有差別謂慧解脫諸阿羅漢有學身證及俱解脫諸阿羅漢如其次第三處應知復次今當略辯上

5  
6  
7  
8  
9  
80  
1  
2  
3  
4  
5  
6  
7  
8  
9  
90  
1  
2  
3  
4  
5  
6  
7  
8  
9  
100  
1  
2  
3  
4  
5

所說義謂薄伽梵此中略示離三界欲於佛聖旨猶有餘依離欲界貪勝進道攝及不還果復有差別謂略顯示解脫勝利等持勝利智慧勝利復有差別謂略顯示增上心慧學所得果及顯增上心慧二學

若以色量我 以音聲尋我 欲貪所執持

彼不能知我 若於內了知 於外不能見

由內果觀察 彼音聲所引 若於內無知

於外而能見 由外果觀察 亦音聲所引

若於內無知 於外不能見 彼普障愚夫

亦音聲所引 若於內了知 於外亦能見

英雄出離慧 非音聲所引

此頌所明謂如有一體是異生未斷虛妄分別欲貪觀見世尊具三十二大丈夫相遂便測量此薄伽梵定是如來應正等覺其所說法決定微妙其弟子眾所行必善彼於後時近不善人聞不正法隨逐他論及他音聲信順於他他所引攝他所引故於佛法僧還生毀謗如是皆由不如實知如來法身故致如此復有異生由內靜慮果天眼通遠見世尊便作是解此薄伽梵定是如來應正等覺餘如前說復有由外欲界繫業果報肉眼見已測量當知彼亦隨逐他論

及他音聲信順於他他所引攝復有異生於爾所見  
都無所有彼普被障長時爲他音聲所引若諸賢聖  
除斷調伏超越欲貪得聖慧眼彼由如是聖慧眼故  
於內證解如來法身雖於外見如來色身或見制多  
或圖畫等而能了知非第一義應正等覺彼由如是  
於內正知於外正觀不隨他論及他音聲不信順他  
非他所引於佛法僧決定信受如是皆由如實了知  
如來法身故致如此復次今當略辯上所說義謂薄  
伽梵此中略示若唯世俗見如來者則不決定若以  
勝義見如來者是則決定當知是名此中略義

第六增上王 染時染自取 於無染不染

染者名愚夫

今此頌中第六增上王者謂心意識若有已度五暴  
流未度第六意暴流爾時其心隨逐諸定所有愛味  
故名染時復有補特伽羅於長夜染取爲已有於可  
愛法執藏不捨是故說彼爲染自取貪名爲染因貪  
所生當來世苦亦名爲染若染自取於所染心不隨  
功用攝受遮止修意對治作意故如是彼心於現法  
中無有染汙於無染心此染自取當來世中因彼諸  
苦亦無有染若有於彼隨作功用而不攝受亦不遮

止不修意對治作意故依此苦因長夜受苦於此苦因不能遠離故名愚夫復次今當略辯上所說義謂薄伽梵此中略示遠離苦因所有勝利及顯苦因能感自苦是愚夫性當知是名此中略義

有城骨爲牆 筋肉而塗飾 其中有貪恚  
慢覆所任持

今此頌中所言城者謂心意識此城唯以骨充軀石筋代繩絛肉當塗漫爲形骸牆周而圍繞此城中有違害善說法毗柰耶所有善法四種惡法之所任持二是在家諸受欲者謂貪與瞋二是惡說法毗柰耶

中而出家者謂慢與覆由著諸欲希求諸欲與鄙穢行不相違背於善說法及毗柰耶尚不信受況當修善恃惡說法而生憍慢不能自然趣佛世尊或弟子所設佛世尊或佛弟子由悲愍故自往其所然彼由覆隨煩惱纏染汙其心尚不如實發露已過況能信解修諸善法如是當知於彼善說法毗柰耶相應善法二種心城皆不能入何況復能取爲已有復次今當略辯上所說義謂薄伽梵此中略示在家出家總由四種雜染因緣失壞善說法毗柰耶當知是名此中略義

如龜藏支於自殼

必芻善攝意尋思

無所依止不惱他

證般涅槃無所誦

此頌所明謂如有一依初靜慮捨三惡尋所謂欲尋  
 恚尋害尋又能棄捨初靜慮地諸善尋思安住無尋  
 無伺定中如龜藏支於其自殼略攝尋思亦復如是  
 無尋無伺定者應知此上乃至有頂彼於此定正安  
 住時不生愛味出已成就可愛樂法調順柔和易可  
 共住不惱有智同梵行者又為智人同梵行者欣樂  
 共住又復成就無違諍法彼由如是正方便故於諸  
 聖諦能入現觀及得漏盡彼於諸法不由他信獲得  
 善淨勝智見故如實了知法真是法毗柰耶真是毗  
 柰耶由如是知故終不依止諸見顛倒於法誦法及  
 於非法亦誦非法終不顯示非法為法法為非法非  
 毗柰耶為毗柰耶或毗柰耶為非毗柰耶復次今當  
 略辯上所說義謂薄伽梵此中略示善說法者四種  
 擾亂斷對治道何等名為四種擾亂一染不染尋思  
 擾亂二於勝定愛味擾亂三互相違諍訟擾亂四於  
 正道誹謗擾亂當知是名此中略義

等不等而生 牟尼捨有行 內樂定差別

如俱舍卵生

此頌所明謂佛示現任最後有菩薩位時先所獲得三十有二大丈夫相八十隨好圓滿莊嚴妙色身生於後證得阿耨多羅三藐三菩提時其色身生與前正等其名身生由勝無漏不相似故與前不等又佛示現內寂靜樂及沙門樂爲依止故得定自在如定心力捨諸壽行及諸有行彼捨邊際妙色身生與前正等其名身生與前不等故有差別如因其殼卵生雞等依卵而生卽此生已漸漸增長種類相似破殼而出如是如來色身名身差別道理當知亦爾此中差別謂佛世尊若不棄捨諸壽行者應滿壽量方般

涅槃定力所持捨壽行故不滿壽量而般涅槃復次今當略辯上所說義謂薄伽梵此中略示捨諸壽行色身名身二種差別及顯棄捨所依因緣當知是名此中略義

無淤泥等欲 無魑魅等暝 無羅網等癡  
無江河等愛

此頌所明謂有四種能爲世俗不自在法世間現見能令有情不自在轉一者陷溺淤泥二者鬼魅所著三者入於羅網四者墮駛流河隨流漂溺復有四種能爲真實不自在法能令有情不自在轉當知亦爾

何等爲四謂如有一生長欲界陷溺不淨腥臊生臭  
諸欲淤泥不能自在引發守護增長善法又如有一  
棄捨諸欲於善說法毗柰耶中而得出家心懷忿怒  
性多惡言由忿所持不得自在不數學處動生違越  
於諸智者同梵行所屢以麤言擊刺訶擯侵惱毀辱  
又如有一棄捨諸欲於惡說法毗柰耶中而得出家  
入諸惡魔大魔見網彼旣入已流轉生死不得自在  
又如有一生長上分諸離欲地於諸愛結未能永斷  
亦未徧知不得自在還生下界順流而住難可出離  
復次今當略辯上所說義謂薄伽梵此中略示諸界

諸品愚夫纏縛復有差別謂如有一陷欲淤泥不能  
自在於善說法毗柰耶中清淨出家又如有一爲性  
忿怒忿怒所蔽憤恚纏心尚於自身或害或損何況  
於他又如有一成就癡品諸惡邪見謂無父母毀謗  
父母於父母所反希敬養況自能爲又如有一廣集  
諸欲貪愛所漂不得自在尚不欲自食況能惠於他  
如是四法當知能障諸聰慧者四應知法謂善說法  
毗柰耶中清淨出家遠離恚害敬事父母樂行惠施  
虛空無鳥迹 外道無沙門 愚夫樂戲論  
如來則無有

此頌所明謂有衆生希樂勝欲求所攝又有衆生希樂勝身有求所攝又有衆生希樂沙門及婆羅門所有解脫梵行求攝此中欲求有求攝者謂我因少分布施少分持戒當得往生善趣天上樂世界中以妙五欲而自賞納歡娛遊戲彼既修習如是願已得最勝欲及最勝身譬如衆鳥翱翔虛空徧虛空中無安足處如是衆生於其所得無常諸欲及身分中都無安住當知亦爾若樂沙門及婆羅門所有解脫梵行求攝復有二種或依善說法或依惡說法依惡說法諸外道輩並無沙門依善說法邪梵行求所攝受

者亦無沙門正梵行求所攝受者得有沙門又此一切三門所攝或欲求門或有求門或梵行求門如是皆名樂著戲論當知如來棄捨一切所有希求故無戲論卽以此義類知如來諸弟子衆正梵行求所攝受者亦無戲論復次今當略辯上所說義謂薄伽梵此中略示離善說法及毗柰耶勤精進者皆空無益當知是名此中略義

住戲論皆無 踰牆墜離處 牟尼遊世間  
天人不能識

此頌所明謂阿羅漢苾芻永離貪愛由四種相於惡

魔怨一切愚夫所繫屬主解脫自在隨意遊行空閑聚落有諸愚夫遇見如是真阿羅漢於最究竟自在遊行不如實知便於二處妄生輕毀云何此善男子棄捨自屬養命珍財乃求屬他資生眾具何故棄捨生天方便苦勤精進求有斷滅是諸愚夫見生天上有勝功德見處居家有多財產故於牟尼妄生輕忽彼所事天於此牟尼廣大功德尚不能了況能事者而能識知云何離愛諸阿羅漢由四種相於惡魔怨一切愚夫所繫屬主解脫自在謂諸愚夫由四識住爲魔怨主之所驅役令生死中往還五趣非阿羅漢

又諸愚夫如由重過爲魔怨主之所驅役謂或增益或復損減諸惡見故發起種種執刀杖等惡不善法墮諸戲論生諸惡趣今造種種諸惡業緣非阿羅漢又諸愚夫如由中過爲魔怨主之所驅役令處欲愛繫縛垣牆不能出離欲界生苦非阿羅漢又諸愚夫如由輕過爲魔怨主之所驅役令生色界及無色界無明深溼周而圍繞閉在生死眾苦牢獄於生等苦不得出離非阿羅漢復次今當略辯上所說義謂薄伽梵此中略示一切愚夫羞不應羞應羞不羞於不應怖而生怖見於應怖中生無怖見當知是名此中

略義

若有熏除諸尋思

於內無餘離分別

超過礙著諸色想

四軌蠲除不往生

此頌所明謂如有一已入有學位未離欲界欲依初靜慮熏除欲界諸惡尋思依第二靜慮內等清淨心一趣性初靜慮地所有分別無餘永離無復分別依第三靜慮超過第二靜慮地諸喜礙著依第四靜慮超過第三靜慮地諸樂礙著依無色定超過一切所有色想如是漸次用依諸定乃至有頂若定若生蠲除四軌何等爲四一蠲除染汙尋思軌二蠲除不染

汙尋思軌三蠲除喜樂繫縛軌四蠲除一切色想軌由此因緣於諸下地不復往生當知異生雖到有頂若定若生猶爲四軌所繫縛故於諸下地還復往生復次今當略辯上所說義謂薄伽梵此中略示到有邊際有學異生二種差別當知是名此中略義

惠施令福增

防非滅怨害

修善捨諸惡

惑盡得涅槃

此頌所明謂如有一於佛所證法毗柰耶獲得正信雖處居家而心遠離慳垢纏縛受持七種依福業事由此因緣若行若住廣說如經乃至生長如是福德

若有復能於善說法毗柰耶中清淨出家既出家已  
具足忍力爲護尸羅雖遭他罵侵惱訶責或以身手  
瓦礫刀杖毆擊傷害恐壞尸羅當爲障礙心無惡念  
不出惡言唯緣彼境與慈俱心於一切方徧滿而住  
由此因緣於現法中自他相續所有怨害並皆止息  
當生無惱樂世界中無多怨敵爲世欣仰衆所樂見  
如是善修正方便已依增上戒起增上心依增上心  
發增上慧當於聖諦入現觀時則能永捨趣惡趣業  
及諸惡趣又修如先所得道故漸次永除所有諸結  
於有餘依涅槃界中而般涅槃如是後時於無餘依  
涅槃界中復般涅槃復次今當略辯上所說義謂薄  
伽梵此中略示得淨信者四種正行一感財富行二  
感善趣行三離惡趣苦清淨修行四離一切苦清淨  
修行當知是名此中略義

諸惡者莫作 諸善者奉行 自調伏其心  
是諸佛聖教

此頌所明謂如有一於佛所證法毗柰耶獲得正信  
於一切種一切因緣一切處所所有惡行皆能斷滅  
於善說法毗柰耶中能善受學尸羅律儀彼由三相  
奉行諸善謂善住尸羅守別解脫清淨律儀乃至受

學所有學處依增上戒學發增上心學依增上心學  
發增上慧學彼由此故於所知境如實知見如是具  
足諸善法已復由三相調伏自心謂如實知故能起  
厭患由厭患故能得離染由離染故能得解脫復次  
今當略辯上所說義謂薄伽梵此中略示三學學果  
顯自聖教不與他共當知是名此中略義

難調伏輕躁 淪墜於諸欲 善調伏其心  
心調引安樂

此頌所明謂宣說心若意若識長夜愛樂憤鬧雜處  
於憤鬧處難得遠離難可調伏雖強安處無間修習  
諸善法中而不一向能住離貪離瞋離癡亦不一向  
能住策舉無掉寂靜然復疾病還生有貪有瞋有癡  
下劣掉舉及不寂靜雖強安處內寂止中長夜愛樂  
色聲香味觸故於五欲境馳趣淪沒諸聖弟子於如  
是等樂著雜染能生苦心終不縱其今自在轉亦不  
隨順數數思擇成辦遠離恒修善法心一境性彼由  
如是正定心故能如實知如實知故能起厭患由厭  
患故能得離染由離染故能得解脫彼既如是善調  
伏心盡苦因故於現法中得安樂住當來眾苦亦得  
永盡復次今當略辯上所說義謂薄伽梵此中略示

能隨順長夜流轉左道之心及不隨順所得勝利  
當知是名此中略義

於心相善知 能餐遠離味 靜慮常委念  
受無染喜樂

此頌所明謂如有一有學見迹能善了知止舉捨相  
由此因緣得四功德謂心住一緣遠離麤重能善受  
用身心安樂是初功德又淨定心盡所修故如所修  
故能正審慮諸染道理獲得內法毗鉢舍那是第二  
功德彼由如是清淨止觀爲依止故於所修習菩提  
分法勇猛無間能常修習能委修習無懈無憚是第

三功德彼由如是無懈憚心獲得第一正念正知心  
善解脫又能受用解脫喜樂及無染樂於現法中得  
安樂住是第四功德復次今當略辯上所說義謂薄  
伽梵此中略示於相善巧四種功德謂奢摩他所作  
毗鉢舍那所作無懈憚所作到究竟所作當知是名  
此中略義

無工巧活輕自己 樂勝諸根盡解脫

無家無所無希望 斷欲獨行真必芻

此頌所明謂成就五支永斷五支當知得名真實必  
芻何等爲五謂不依止矯設方便邪活命法亦不恃

賴有勢之家亦不修治名稱族望亦不詐受諸佛所說聖弟子說猶如依止工巧處所非法希求衣服飲食是名初支又復減省器物眾具善棄珍財衣僅蔽身食纔充腹知足歡喜凡所遊行必持衣鉢是第二支又希慕沙門愛樂沙門希慕學處愛樂學處命難因緣尚不違越所學禁戒何況少小利養因緣是第三支又彼如是正修方便淨命喜足愛樂學處於諸聖諦未現觀者能入現觀得清淨見或時失念暫爾發生惡不善尋引起貪欲瞋恚愚癡遲緩忘念速復除遣是第四支又彼修習如先得道於諸結縛一切

隨眠隨煩惱纏心得解脫是第五支如是名爲成就五支云何復名永斷五支謂阿羅漢苾芻於五處所不復能犯所謂不能捨所學處而復退還又復不能有所貯積執爲已有而受用之亦不受用諸欲境界又復不能爲財爲命知而妄語又復不能棄捨諸欲行不與取亦不復能永離貪欲獨住獨行而更習近非梵行法兩兩交會或計自作而招苦樂或計他作或自他作或非自作亦非他作不由因生而招苦樂如是名爲五支永斷

心遠行獨行 無身寐於窟 能調伏難伏

我說婆羅門

今此頌中所言心者亦名爲意亦名爲識此於過去一切愚夫無量差別自體展轉及因展轉雖無作者而流生死前際叵知故名遠行此於現在一一而轉第二伴心所遠離故一切種心不頓轉故名爲獨行又此現在隨其自體初起現前或由貪性或由瞋性或由癡性或由一一所餘煩惱隨煩惱性卽彼自體不畢竟轉如五色根或同或異或劣或勝隨其自體初起現前卽此自體畢竟而轉心不如是何以故心經彼彼日夜剎那臘縛等位非一衆多種種品類異

生時生異滅時滅由心自性染汙之體不成實故名爲無身此未來世居四識住而有隨眠可於後生有往來義名寐於窟若有聰慧由此四相能於過現未來世心如實了知修厭離滅及心解脫彼能超度諸薩迦耶到於彼岸安住陸地名婆羅門復次今當略辯上所說義謂薄伽梵此中略示心於過去長時染汙無作者性於現在世性是剎那自性清淨於未來世由有放逸不放逸故染汙清淨當知是名此中略義

誰能覆世間 誰能令不顯 誰復能塗染

誰為大怖畏 無明覆世間 放逸令不顯

戲論能塗染 苦為大怖畏 諸流處處漏

是漏誰能止 當說誰防護 衆流誰所堰

世間諸流漏 是漏念能止 我說能防護

由慧故能堰 念慧與名色 今問是一切

何當永滅盡 唯願為我說 念慧與名色

我說是一切 若諸識永滅 於斯永滅盡

云何念所行 諸識當永滅 今請垂方便

為釋令無疑 於內外諸受 都不生欣樂

如是念所行 諸識當永滅 若諸善說法

及有學異類 彼常委能趣 請大仙為說

不耽著諸欲 其心無濁染 於諸法巧念

是苾芻能趣

此是波羅延中因阿氏多所請問頌言世間者略有三種一欲世間二色世間三無色世間今此義中意辯出家在家二種世間出家世間復有二種一惡說法二善說法惡說法者無明所覆善說法者由有明故應可顯了由放逸故令不顯了若諸在家異類白承為諸戲論之所塗染當知戲論略有三種謂三種言事名為戲論於四種言說有所宣談亦名戲論能

發語言所有尋伺亦名戲論若於過去未來現在三種言事依四言說發起異類分別思惟或違或順是名塗染若前戲論若後塗染諸在家者多分可得是故說彼爲諸論戲之所塗染此中惡說法者無明所覆善說法者放逸不顯諸在家者戲論塗染彼於現法苦因轉時於此苦因不能如實知是苦因於此苦因愛樂而住由此因緣生當來苦卽說此苦名大怖畏又惡說法者由無明門從六處流漏泄衆苦諸在家者由戲論門從六處流漏泄衆苦善說法者由放逸門從六處流漏泄衆苦如是無明放逸戲論諸門

流漏由聞他音內正作意於諸行中了知過患此相應念逆流而轉故能遮止如是方便名伏對治若出世間正見所攝諸無漏慧於三種流皆能堰塞如是方便名斷對治於此流漏若伏若永二種對治皆能斷故俱名防護又惡說法者及在家者一向墮於染汙品攝若善說法毗柰耶中二種可得諸縱逸者墮雜染品非顯了攝不縱逸者墮清淨品顯了所攝又若已顯了若應顯了當知二種皆無放逸諸阿羅漢斯已顯了於不放逸無更須作不放逸事於四念住若念若慧已善修故已善證得清淨識故唯有決定

於無餘依涅槃界中善清淨識當永滅故若念若慧亦隨永滅餘依所攝先業所引一切名色亦隨滅盡乃至彼法未永滅來於六恒住常善安住於離欲地所有內受及於諸欲相應外受不生欣樂如是名爲諸阿羅漢正念現行乃至壽盡識方永滅若諸有學斯應顯了於不放逸應更須作不放逸事彼復二種於不放逸不放逸事謂常所作委悉所作有學異類若諸有學極七反有或復家家一來果等及於現法堪般涅槃於下分結及上分結心無染汙爲斷彼故修習對治又於諸欲不耽著故諸下分結不能染汙

心無濁故諸上分結不能染汙又於一切有苦法中如實知集乃至出離於四念住善住其心修習如先所得聖道能趣究竟如是修習對治道故彼於一切不放逸中諸所應作不放逸事皆得究竟復次今當略辯上所說義謂薄伽梵此中略示諸在家者及於外法而出家者決定雜染及顯於善說法毗柰耶中而出家者若行放逸墮染汙品若不放逸墮清淨品當知是名此中略義

於諸欲希求 或所期果遂 得已心定喜  
至死而保愛 諸樂欲衆生 若退失諸欲

其色便變壞 如毒箭所中 若遠離諸欲

猶如毒蛇首 彼於愛世間 正念能超度

田事與金銀 牛馬珠環釧 女僕增諸欲

是人所耽樂 攀緣沉下劣 變壞生諸漏

從此集眾苦 如船破水溢 若永絕諸欲

如斷多羅頂 棄捨諸愁憂 猶蓮華水滴

此是義品中依諸欲頌謂如有一希求未來所有諸欲為獲得故發勤方便得已現前耽著受用如是希求及正受用所得諸欲由此因緣生喜生樂如是總名諸欲愛味又彼希求及正受用所有諸欲於其所

得所受用事若退失時隨彼諸欲戀著愛味愛箭入心中毒箭受大憂苦或致殞沒如是名為諸欲過患又復毒蛇譬諸欲境界毒蛇首者譬諸欲中所有愛味若諸愚夫愛味諸欲貪著受用如蛇所螫若有多聞諸聖弟子遠離諸欲所有愛味如毒蛇首終不愛染而受用之廣說乃至不生耽著彼於諸色所有貪愛乃至於觸所有貪愛皆能調伏斷滅超度如是名為諸欲出離又諸欲自性略有二種一者事欲二煩惱欲事欲有二一者穀彼所依處謂田事二者財彼所依處謂金銀等事何以故諸求穀者必求田事諸

論  
華嚴經疏卷十九  
二十二  
求財者必求金銀等事求金銀等復有二種一者事  
王二者商賈求穀求田方便須牛求財事王方便須  
馬求財商賈所有方便若金銀等共相應者謂諸寶  
珠金銀異類不相應者謂環釧等此舉最勝若買賣  
言說事務當知亦爾積集如是財穀事已受用戲樂  
所有助伴謂諸女色若未積集招集守護及息利中  
所有助伴謂諸僮僕如是財穀積集廣大於此處所  
耽樂不捨如是一切皆各事欲煩惱欲者謂於事欲  
隨逐愛味依耽著識發生種種妄分別貪又於事欲  
由煩惱欲令心沉沒成下劣性若彼事欲變壞散失

便生諸漏愁歎憂悲種種苦惱纏繞其心彼由如是  
於現法中諸漏蔽伏無有對治猶如船破水漸盈溢  
招集當來生老病等種種苦惱若於諸欲已得出離  
便能永絕隨欲愛味發起貪著諸染汙識猶如斷截  
多羅樹頂不復生長又彼事欲可愛可樂乃至可意  
若變壞時於清淨識諸憂愁等一切苦惱皆不得住  
如蓮華葉水滴不著復次今當略辯上所說義謂薄  
伽梵此中略示諸欲愛味過患出離三種自性又顯  
愛味能爲過患及彼出離所有功德當知是名此中  
略義

於過去無戀 不希求未來 現在諸法中  
處處徧觀察 智者所增長 無奪亦無動  
此是造賢善頌謂如有一於佛所證法毗柰耶獲得  
淨信以正信心棄捨家法趣於非家由五種相修行  
梵行令善清淨謂能捨離居家諸行無所顧戀亦不  
緣彼心生追戀還起染著是名初相又於現法利養  
恭敬未來種類所有諸行不生希望亦不願求當來  
人天所有諸行修行梵行是第二相又於現在五取  
蘊攝色等諸法及彼安立能正觀察又於現法及當  
來世諸身惡行及惡果報謂我於身不應發起所有

惡行廣說如經乃至應斷身諸惡行修身善行語意  
善行當知亦爾又於色等諸蘊能隨觀察去來今世  
皆是無常無常故苦苦故無我由無我故於彼一切  
不執我所乃至於彼不執為我如是如實正慧觀察  
是第三相又依初法毗鉢舍那諸根成熟福德智慧  
二種資糧於當來世通達增長非諸王等所能劫奪  
是第四相又依第二法毗鉢舍那於現法中涅槃功  
德能善增長非諸煩惱及隨煩惱所能傾動是第五  
相由此五相修行梵行令善清淨若依如是一日一  
夜亦為賢善第一賢善當知超度此餘一切所有梵

行復次今當略辯上所說義謂薄伽梵此中略示於善說法毗柰耶中所修梵行於一切相皆善清淨不與他共當知是名此中略義唄陀南曰

惡說貪流怖 類與池流貪 作劬勞得義

論議十四種

瑜伽師地論卷第十九

音釋

駛奕土切

壅七豔切

軛於韋切

螫施隻切 行毒也

丹陽居士賀學易施資刻此  
瑜伽師地論第十九卷 益州沙門性淨對  
長洲徐普書 進賢傅汝禎刻  
萬曆己亥春三月徑山寂照庵識

瑜伽師地論卷第二十

彌勒菩薩說

唐三藏沙門玄奘奉詔譯

本地分中修所成地第十二

已說思所成地云何修所成地謂略由四處當知普攝修所成地何等四處一者修處所二者修因緣三者修瑜伽四者修果如是四處七支所攝何等為七一生圓滿二聞正法圓滿三涅槃為上首四能熟解脫慧之成熟五修習對治六世間一切種清淨七出世間一切種清淨如此四處七支所攝普聖教義廣



說應知依善說法毗柰耶中一切學處皆得圓滿云  
何生圓滿當知略有十種謂依內有五依外有五總  
依內外合有十種云何生圓滿中依內有五謂衆同  
分圓滿處所圓滿依止圓滿無業障圓滿無信解障  
圓滿衆同分圓滿者謂如有一生在人中得丈夫身  
男根成就處所圓滿者謂如有一生在人中又處中  
國不生邊地謂於是處有四衆行謂苾芻苾芻尼近  
事男近事女不生達須箴戾車中謂於是處無四衆  
行亦無賢聖正至正行諸善丈夫依止圓滿者謂如  
有一生處中國不缺眼耳隨一支分性不頑嚚亦不

瘖瘂堪解了善說惡說所有法義無業障圓滿者  
謂如有一依止圓滿於五無間隨一業障不自造作  
不教他作若有作此於現身中必非證得賢聖法器  
無信解障圓滿者謂如有一必不成就五無間業不  
於惡處而生信解不於惡處發清淨心謂於種種邪  
天處所及於種種外道處所由彼前生於佛聖教善  
說法處修習淨信長時相續由此因緣於今生中唯  
於聖處發生信解起清淨心云何生圓滿中依外有  
五謂大師圓滿世俗正法施設圓滿勝義正法隨轉  
圓滿正行不減圓滿隨順資緣圓滿大師圓滿者謂

卽彼補特伽羅具內五種生圓滿已復得值遇大師  
出世所謂如來應正等覺一切知者一切見者於一  
切境得無障礙世俗正法施設圓滿者謂卽彼補特  
伽羅值佛出世又廣開示善不善法有罪無罪廣說  
乃至諸緣生法及廣分別謂契經應頌記蒯諷誦自  
說緣起譬喻本事本生方廣希法及與論議勝義正  
法隨轉圓滿者謂卽大師善爲開示俗正法已諸弟  
子衆依此正法復得他人爲說隨順教戒教授修三  
十七菩提分法得沙門果於沙門果證得圓滿又能  
證得展轉勝上增長廣大所有功德正行不減圓滿

者謂佛世尊雖般涅槃而俗正法猶住未滅勝義正  
法未隱未斷隨順資緣圓滿者謂卽四種受用正法  
因緣現前受用正法諸有正信長者居士婆羅門等  
知彼受用正法而轉恐乏資緣退失如是所受正法  
是故殷勤奉施種種衣服飲食諸坐臥具病緣醫藥  
供身什物如是十種名依內外生圓滿卽此十種生  
圓滿名修瑜伽處所由此所依所建立處爲依止故  
證得如來諸弟子衆所有聖法如是聖法略有二種  
一有學法二無學法今此義中意取無學所有聖法  
謂無學正見廣說乃至無學正智何以故由諸有學

雖有聖法而相續中非聖煩惱之所隨逐現可得故如是初支生圓滿廣聖教義有此十種除此更無餘生圓滿若過若增云何聞正法圓滿謂若正說法若正聞法二種總名聞正法圓滿又正說法略有二種所謂隨順及無染汙廣說當知有二十種如菩薩地當說又正聞法略有四種一遠離憍傲二遠離輕慢三遠離怯弱四遠離散亂遠離如是四種過失而聽法者名正聞法當知廣說有十六種亦如菩薩地中當說云何涅槃爲上首謂如來弟子依生圓滿轉時如先所說相而聽聞正法唯以涅槃而爲上首唯求

涅槃唯緣涅槃而聽聞法不爲引他令信於已不爲利養恭敬稱譽又緣涅槃而聽法者有十法轉涅槃爲首謂依止有餘依涅槃界及無餘依涅槃界當知依止有餘依涅槃界有九法轉涅槃爲首依止無餘依涅槃界有一法轉涅槃爲首謂以聞所成慧爲因於道道果涅槃起三種信解一信實有性二信有功德三信已有能樂方便如是信解生已爲欲成辦思所成智身心遠離憤鬧而住遠離障蓋諸惡尋思依止此故便能趣入善決定義思所成智依止此故又能趣入無間殷重二修方便由此次第乃至證得修

所成智依止此故見生死過失發起勝解見涅槃功德發起勝解由串修故入諦現觀先得見道有學解脫已得見迹於上修道由數習故更復證得無學解脫由證此故解脫圓滿卽此解脫圓滿名有餘依涅槃界卽此涅槃以爲上首今前九法次第修習而得圓滿當知卽此解脫圓滿以無餘依涅槃界而爲上首如是涅槃爲首聽聞正法當知獲得五種勝利何等爲五謂聽聞法時饒益自他修正行時饒益自他及能證得衆苦邊際若說法師爲此義故宣說正法其聽法者卽以此意而聽正法是故此時名饒益他

又以善心聽聞正法便能領受所說法義甚深上味因此證得廣大歡喜又能引發出離善根是故此時能自饒益若有正修法隨法行大師爲欲建立正法方便示現成正等覺云何令彼正修行轉故彼修習正法行時卽是法爾供養大師是故說此名饒益他因此正行堪能證得寂靜清涼唯有餘依涅槃之界是故說此能自饒益若無餘依涅槃界中般涅槃時名爲證得衆苦邊際是名涅槃以爲上首聽聞正法所得勝利如是名爲涅槃爲首所有廣義除此更無若過若增云何能熟解脫慧之成熟謂毗鉢舍那支

成熟故亦名慧成熟奢摩他支成熟故亦名慧成熟  
所以者何定心中慧於所知境清淨轉故又毗鉢舍  
那支最初必用善友爲依奢摩他支尸羅圓滿之所  
攝受又依善友之所攝受於所知境真實性中有覺  
了欲依尸羅圓滿之所攝受於增上尸羅毀犯淨戒  
現行非法壞軌範中若諸有智同梵行者由見聞疑  
或舉其罪或令憶念或令隨學於爾所時堪忍譏論  
又依所知真實覺了欲故愛樂聽聞初樂聞故便發  
請問依請問故聞昔未聞甚深法義數數聽聞無間  
斷故於彼法義轉得明淨又能除遣先所生疑如是

覺慧轉明淨故於諸世間所有盛事能見過患深心  
厭離如是厭心善作意故於彼一切世間盛事不生  
願樂彼由如是於諸世間增上生道無願心故爲欲  
斷除諸惡趣法心生正願又爲修習能對治彼所有  
善法修習一切煩惱對治所有善法爲欲證得彼對  
治果亦爲自心得清淨故心生正願如是十種能熟  
解脫慧成熟法如先所說漸次能令解脫圓滿又隨  
次第已說三支謂聞正法圓滿涅槃爲上首能熟解  
脫慧之成熟如是三支廣聖教義謂十種除此更無  
若過若增又此三支當知卽是修瑜伽因緣何以故

由依此次第此因此緣修習瑜伽方得成滿謂依聞  
正法圓滿涅槃爲上首能熟解脫慧成熟故云何修  
習對治當知略說於三位中有十種修習瑜伽所對  
治法云何三位一在家位二出家位三遠離閑居修  
瑜伽位云何十種修習瑜伽所對治法謂在家位中  
於諸妻室有姪欲相應貪於餘親屬及諸財寶有受  
用相應愛如是名爲處在家位所對治法由此障礙  
於一切種不能出離設得出家由此尋思之所擾動  
爲障礙故不生喜樂如是二種所對治法隨其次第  
修不淨想修無常想當知是彼修習對治又出家者

於出家位中時時略有四種所作一常方便修善法  
所作謂我於諸法常方便修爲依止故當能制伏隨  
愛味樂一切心識又能如實覺了苦性二於無戲論  
涅槃信解愛樂所作謂我當於無戲論涅槃心無退  
轉不生憂慮謂我今者何所在耶三於時時中遊  
行聚落乞食所作謂我乞食受用爲因身得久住有  
力調適常能方便修諸善法四於遠離處安住所作  
謂若愛樂與諸在家又出家衆雜居住者便有種種  
世間相應見聞受用諸散亂事勿我於彼正觀觀察  
心一境位當作障礙於四種所作事中當知有四所

對治法於初所作有懶惰懈怠於第二所作有薩迦耶見於第三所作有愛味貪於第四所作有世間種種樂欲貪愛如是四種所對治法如其次第亦有四種修習對治一於無常修習苦想二於衆苦修無我想三於飲食修厭逆想四於一切世間修不可樂想又於遠離閑居方便作意位中當知略有四種所治何等爲四一於奢摩他毗鉢舍那品有暗昧心二於諸定有隨愛味三於生有隨動相心四推後後日顧待餘時隨不死尋不能熾然勤修方便如是四種所對治法當知亦有四種修習對治一修光明想二修

離欲想三修滅想四修死想又不淨想略有二種一思擇力攝二修習力攝思擇力攝不淨想中當知五法爲所對治何等爲五一親近母邑二處顯失念三居隱放逸四通處隱顯由串習力五雖勤方便修習不淨而作意錯亂謂不觀不淨隨淨相轉如是名爲作意錯亂修習力攝不淨想中當知七法爲所對治何等爲七謂本所作事心散亂性本所作事趣作用性方便作意不善巧性由不恭敬勤請問故又由不能守根門故雖處空閑猶有種種染汗尋思擾亂其心又於飲食不知量故身不調適又爲尋思所擾亂

論  
五  
論師共卷二十  
故不樂遠離內心寂靜奢摩他定又由彼身不調適  
故不能善修毗鉢舍那不能如實觀察諸法如是一  
切所對治法當知總說一門十二一門十四又卽如  
是所對治法能治白法還有爾所於修二種不淨想  
中當知多有所作又於無常所修苦想略有六種所  
對治法何等爲六一於未生善法最初應生而有懶  
惰二於已生善法應住不忘修習圓滿倍令增廣所  
有懈怠三於恭敬師長往請問中不恒相續四於恒  
修善法常隨師轉遠離淨信五由遠離淨信不能常  
修六於內放逸由放逸故於常修習諸善法中不恒

隨轉如是六種所對治法還有六法能爲對治多有  
所作與此相違應知其相又光明想緣多光明以爲  
境界如三摩呬多地中已說今此義中意辯緣法光  
明以爲境界修光明想謂如所聞已得究竟不忘念  
法名法光明與彼俱行彼相應想應知名光明想何  
以故真實能令心暗昧者謂方便修止觀品時於諸  
法中所有忘念與此相違當知卽是光明又第一義  
思所成慧及修所成慧俱光明想有十一法爲所對  
治云何十一謂思所成慧俱光明想有四法修所成  
慧俱光明想有七法如是所治合有十一思所成慧

俱光明想有四法者一不善觀察故不善決定故於  
所思惟有疑隨逐二住於夜分懶惰懈怠故多習睡  
眠故虛度時分三住於晝分習近邪惡食故身不調  
柔不能隨順諦觀諸法四與在家出家共相雜住於  
隨所聞所究竟法不能如理作意思惟如是疑隨逐  
故障礙能遣疑因緣故此四種法是思所成慧俱光  
明想之所對治令思所成若智若見不得清淨何等  
名爲修所成慧俱光明想所治七法一依舉相修極  
勇精進所對治法二依止相修極劣精進所對治法  
三依捨相修貪著定味與愛俱行所有勇悅四於般

涅槃心懷恐怖與瞋恚俱其心怯弱二所治法五卽  
依如是方便作意於法精勤論議決擇於立破門多  
生言論相續不捨此於寂靜正思惟時能爲障礙六  
於色聲香味觸中不如正理執取相好不正尋思令  
心散亂七於不應思處強攝其心思擇諸法如是七  
種是修所成慧俱光明想所對治法極能障礙修所  
成慧俱光明想令修所成若智若見不清淨轉此所  
治法還有十一與此相違能對治法能斷於彼當知  
亦令思修所成若智若見清淨而轉又正方便修諸  
想者有能斷滅所治法欲又於所治現行法中心不

染著速令斷滅又能多住能對治法斷滅一切所對  
治法如是三法隨逐一切對治修故名多所作如是  
名爲修習對治此修對治當知卽是修習瑜伽此第  
五支修習對治廣聖教義當知唯有如是十相除此  
更無若過若增云何世間一切種清淨當知略有三  
種一得三摩地二三摩地圓滿三三摩地自在此中  
最初有二十種得三摩地所對治法能令不得勝三  
摩地何等二十一有不樂斷同梵行者爲伴過失二  
伴雖有德然能宣說修定方便師有過失謂顛倒說  
修定方便三師雖有德然於所說修定方便其能聽

者欲樂羸劣心散亂故不能領受過失四其能聽者  
雖有樂欲屬耳而聽然暗鈍故覺慧劣故不能領受  
過失五雖有智德然是愛行多求利養恭敬過失六  
多分憂愁難養難滿不知喜足過失七卽由如是增  
上力故多諸事務過失八雖無此失然有懈怠懶惰  
故棄捨加行過失九雖無此失然有爲他種種障礙  
生起過失十雖無此失然有於寒熱等苦不能堪忍  
過失十一雖無此失然有慢恚過故不能領受教誨  
過失十二雖無此失然有於教顛倒思惟過失十三  
雖無此失然有於所受教有忘念過失十四雖無此

失然有在家出家雜住過失十五雖無此失然有受  
用五失相應臥具過失五失相應臥具應知如聲聞  
地當說十六雖無此失然於遠離處不守護諸根故  
有不正尋思過失十七雖無此失然由食不平等故  
有身沉重無所堪能過失十八雖無此失然性多睡  
眠有多睡眠隨煩惱現行過失十九雖無此失然不  
先修行奢摩他品故於內心寂止遠離中有不欣樂  
過失二十雖無此失然先不修行毗鉢舍那品故於  
增上慧法毗鉢舍那如實觀中有不欣樂過失如是  
二十種法是奢摩他毗鉢舍那品證得心一境性之

所對治又此二十種所對治法略由四相於所生起  
三摩地中堪能爲障何等爲四一於三摩地方便不  
善巧故二於一切修定方便全無加行故三顛倒加  
行故四加行縵緩故此三摩地所對治法有二十種  
白法對治與此相違應知其相由此能斷所對治法  
多所作故疾能得正住其心證三摩地又得此三  
摩地當知卽是得初靜慮近分定未至位所攝又此  
得三摩地相違法及得三摩地隨順法廣聖教義當  
知唯有此二十種除此更無若過若增由此因緣依  
初世間一切種清淨於此正法補特伽羅得三摩地

論  
已善宣說已善開示復次如是已得三摩地者於此  
少小殊勝定中不生喜足於勝三摩地圓滿更起求  
願又卽於彼見勝功德又由求願見勝功德爲求彼  
故勇猛精進策勵而住又彼於色相應愛味俱行煩  
惱非能一切皆永斷故名非得勝又非於彼諸善法  
中皆勤修故名他所勝又於廣大淨天生處無有沉  
沒又彼無能陵熾於已下劣信解增上力故又彼如  
是心無沉沒於定所緣境界法中卽先所得止舉捨  
相無間殷重方便修故隨順而轉又彼如是隨法相  
轉數入數出爲欲證得速疾通慧依定圓滿樂聞正

法故於時時中殷勤請問又依如是三摩地圓滿故  
於正方便根本定攝內心奢摩他證得遠離愛樂又  
證得法毗鉢舍那如是觀察熾然明淨所有愛樂當  
知齊此已能證入根本靜慮如是名爲三摩地圓滿  
又此三摩地圓滿廣聖教義當知唯有如是十相除  
此更無若過若增復次雖已證得根本三摩地故名  
三摩地圓滿其心猶爲三摩地生愛味慢見疑無明  
等諸隨煩惱之所染汙未名圓滿清淨鮮白爲令如  
是諸隨煩惱不現行故爲練心故爲調心故彼作是  
思我應當證心自在性定自在性於四處所以二十

二相應善觀察謂自誓受下劣形相威儀眾具又自誓受禁制尸羅又自誓受精勤無間修習善法若有爲斷一切苦惱受此三處應正觀察眾苦隨逐由剃除鬚髮故捨俗形好故著壞色衣故應自觀察形色異人如是名爲觀察誓受下劣形相於行住坐臥語默等中不隨欲行制伏憍慢往趣他家審正觀察遊行乞食如是名爲觀察誓受下劣威儀又正觀察從他獲得無所畜積諸供身具如是名爲觀察誓受下劣眾具由此五相當知是名初處觀察又善說法毗柰耶中諸出家者所受尸羅略捨二事之所顯現一

者棄捨父母妻子奴婢僕使朋友眷屬財穀珍寶等所顯二者棄捨歌舞倡妓笑戲歡娛遊縱掉逸親愛聚會種種世事之所顯現又彼安住尸羅律儀不由犯戒私自懇責亦不爲彼同梵行者以法訶擯有犯尸羅而不輕舉若於尸羅有所缺犯由此因緣便自懇責若同梵行以法訶擯即便如法而自悔除於能舉罪同梵行者心無恚恨無損無惱而自修治由此五相是名於第二處觀察如是尸羅善圓滿已應以五相精勤方便修諸善品謂時時諒受讀誦論量決擇勤修善品如是乃應受他信施又樂遠離以正

方便修諸作意又復晝夜於退分勝分二法知斷修習又於生死見大過失又於涅槃見勝功德由此五相是名第三處觀察如是精勤修善品者略爲四苦之所隨逐謂於四沙門果未能隨有所證故猶爲惡趣苦所隨逐體是生老病死法故爲內壞苦之所隨逐一切所愛離別法故爲愛壞苦之所隨逐自業所作故一切苦因之所隨逐彼爲如是四苦隨逐應以七相審正觀察由此七相是名第四處觀察彼於如是四處以二十二相正觀察時便生如是如理作意謂我爲求如是事故誓受下劣形相威儀及資身具

誓受禁戒誓受精勤常修善法而我今者於四種苦爲脫何等若我如是我策自勵誓受三處猶爲四苦常所隨逐未得解脫我今不應爲苦隨逐未於勝定獲得自在中路止息或復退屈如是精勤如理作意乃得名爲出家之想及沙門想彼於圓滿修多方便以爲依止由世間道證得三摩地圓滿故於煩惱斷猶未證得復依樂斷常勤修習又彼已得善世間道數數爲得三摩地自在故依止樂修無間而轉又於正信長者居士婆羅門等獲得種種利養恭敬而不依此利養恭敬而生貪著亦不於他利養恭敬及餘

不信婆羅門等對面背面諸不可意身業語業現行  
事中心生憤恚又復於彼無損害心又愛慢見無明  
疑惑種種定中諸隨煩惱不復現行善守念住又非  
證得勝奢摩他卽以如是奢摩他故謂已一切所作  
已辦亦不向他說已所證彼由如是樂斷樂修心無  
貪恚正念現前離增上慢於諸衣服隨宜獲得便生  
喜足如於衣服於餘飲食臥具等喜足當知亦爾又  
正了知而爲受用謂如是等諸資生具但爲治身令  
不敗壞暫止饑渴攝受梵行廣說乃至於食知量彼  
由如是正修行故於三摩地獲得自在依止彼故其

心清白無有瑕穢離隨煩惱廣說乃至獲得不動能  
引一切勝神通慧是名三摩地自在此三摩地自在  
廣義當知唯有如所說相除此更無若過若增又先  
所說得三摩地若中所說三摩地圓滿及今所說三  
摩地自在總名無上世間一切種清淨當知此清淨  
唯在正法非諸外道云何出世間一切種清淨當知  
略有五種何等爲五一入聖諦現觀二入聖諦現觀  
已離諸障礙三入聖諦現觀已爲欲證得速疾通慧  
作意思惟諸歡喜事四修習如所得道五證得極清  
淨道及果功德云何入聖諦現觀謂有如來諸弟子



應過患心生厭患當知清淨不相應過患有五種一於邊地生未能止息二於惡道生未能止息三於在家衆諸無間業未能偃塞四於出家衆無量見趣未不相應五離由世間道乃至有頂若定若生而於無初後際生死流轉未作邊際彼觀自身有訛五種清淨不相應過患心生厭患於已清淨見難成辦當知亦有五種一若捨不爲不能自作故二於所餘事非請他爲能成辦故三決定應作故由於自心未令清淨必於衆苦不得解脫成吉祥性四非於惡業現在不作卽說彼爲已作清淨卽名已得於現見法永離

熾然無對治道先所造作惡不善業必不壞故五由彼清淨學無學道證得所顯故彼觀清淨由此五相難可成辦心生厭患又復發起堅固精進爲欲證得彼由觀見雜染清淨相應不相應故心生厭患又由觀見雜染清淨相應不相應過患故心生怖畏又於清淨證得及雜染斷滅中有懶惰懈怠故心便遮止又由作意思惟彼相故以生厭患卽於此相多所作故心極厭患如厭患極厭患怖畏極怖畏遮止極遮止當知亦爾如是彼以由厭俱行想於五處所以二十種相作意思惟故名善修治復有五因二十種相

之所攝受令於愛盡寂滅涅槃速疾多住心無退轉亦無憂慮謂我我今者爲何所在何等五因一由通達作意故謂由如是通達作意無間必能趣入正性離生入諦現觀證聖智見二由所依故謂由依此所依無間必能趣入正性離生餘如前說三由入境界門故謂由緣此入境界門必能趣入正性離生餘如前說四由攝受資糧故謂由此攝受資糧必能趣入正性離生餘如前說五由攝受方便故謂由攝受如是方便必能趣入正性離生乃至廣說如是五因當知依諦現觀逆次因說非順次因依最勝因如先說

事逆次說故謂於空無願無相加行中於隨入作意微細現行有間無間隨轉我慢俱行心相能障現觀作意正通達故既通達已於作意俱行心任運轉中能善棄捨令無間滅依無間滅心由新所起作意以無常等行如實思惟由此作意修習多修習故所緣能緣平等平等智生彼於爾時能障現觀我慢亂心便永斷滅證得心一境性便自思惟我已證得心一境性如實了知當知是名由通達作意故入諦現觀又若先以世間道得三摩地亦得圓滿亦得自在彼或於入三摩地相謂由此故入三摩地或於住三摩

地相謂由此故住三摩地或於出三摩地相謂由此故出三摩地於此諸相作意思惟安住其心入諦現觀若得三摩地而未圓滿亦未自在彼或思惟止相或思惟舉相或思惟捨相安住其心入諦現觀如是當知由所依故其心安住又有二法於修現觀極爲障礙何等爲二一不正尋思所作擾亂心不安靜二於所知事其心顛倒爲欲對治如是障礙當知有二種於所緣境安住其心謂爲對治第一障故修阿那波那念爲對治第二障故修諸念住如是當知由入境界門故其心安住又於妙五欲樂習近者於聖法

毗柰耶非所行處若於隨宜所得衣服飲食諸坐臥具便生喜足隨所獲得利養恭敬制伏其心謂依妙五欲不由所得利養恭敬心便堅住由此因緣遠離一切非所行處既遠離已依諸念住樂斷樂修於晝夜分時時觀察自他所有衰盛等事心生厭患又復修習佛隨念等令心清妙又復安住諸聖種中如是當知由資糧故其心安住此依最勝資糧道說又彼如是資糧住已爲修相應作意加行故有二種加行方便何等爲二一自於契經阿毗達磨讀誦受持修正作意於蘊等事令極善巧二依他師教所謂大師

鄔波柁耶阿遮利耶於時時間教授教誡攝受依止  
又正加行作意思惟當知是名第三方便此正加行  
作意思惟名正加行此中義者謂尸羅淨所有作意  
名正加行作意思惟彼自思惟尸羅清淨故無悔惱  
無悔惱故便生歡喜廣說乃至心入正定是故宣說  
此正加行作意思惟名心住方便由如是方便故心  
速安住彼於爾時由此五因二十種相攝持其心於  
愛盡寂滅涅槃界中令善安住無復退轉心無驚怖  
謂我我今者何所在耶當於如是心安住時應知已  
名入諦現觀如是各入聖諦現諦又此聖諦現觀義

廣說應知謂心厭患相有二十種心安住相亦二十  
種除此更無若過若增云何入聖諦現觀已離諸障  
礙當知此障略有二種一行處障二住處障行處障  
者謂如聖弟子或與衆同居隨其生起僧所作事業  
捨善品數與衆會或復安住常乞食法而愛重飲食  
或兼二處好樂營爲衣鉢等事或爲讀誦經典而好  
樂談話或居夜分而樂著睡眠或居晝分樂王賊等  
雜染言論或於是處有親戚交遊談詭等住而於是  
處不樂遠離謂長夜數習與彼共居增上力故或復  
樂與第二共住諸如是等名行處障住處障者謂處

空閑修奢摩他毗鉢舍那總名爲住依奢摩他毗鉢舍那當知復有四種障礙一毗鉢舍那支不隨順性二奢摩他支不隨順性三彼俱品念不隨順性四處所不隨順性若謂已聰明而生高舉不從他聞順觀正法名毗鉢舍那支不隨順性若不安靜身語意行躁動輕舉數犯尸羅生憂悔等乃至不得心善安住當知是名奢摩他支不隨順性若有忘念增上力故於沉掉等諸隨煩惱心不遮護當知是名彼俱品念不隨順性若有習近五失相應諸坐臥具當知是名處所不隨隨性或於晝分多諸諠逸於夜分中多

蚊蟲等衆苦所觸又多怖畏多諸災癘衆具匱乏不可愛樂惡友攝持無諸善友諸如是等名住處障又此二障當知總有二種因緣能爲遠離一多諸定樂二多諸思擇多諸定樂應知略有六種謂若有已得三摩地而未圓滿未得自在彼應修習止舉捨三種善巧由此發生多諸定樂若有於三摩地已得圓滿亦得自在彼應修習入住出定三種善巧由此發生多諸定樂云何名爲多諸思擇謂勝善慧名爲思擇由此慧故於晝夜分自已所有善法增長如實了知不善法增長如實了知善法衰退如實了知不善法

衰退如實了知又彼如於晝夜若行若住習近衣服飲食命緣由習近故不善法增長善法衰退或善法增長不善法衰退皆如實了知卽此思擇爲依止故於所生起諸不善法由不堅著方便道理驅擯遠離於諸善法能勤修習如是二處十種善巧於二處所十一種障能令斷滅隨所生起卽便遠離如是名爲遠離障礙又此遠離障礙義廣說應知如所說相除此更無若過若增云何入聖諦現觀已爲欲證得速疾通慧作意思惟諸歡喜事謂聖弟子已見聖諦已得證淨卽以證淨爲依止故於佛法僧勝功德田作

意思惟發生歡喜又依自增上生事及決定勝事謂已身財寶所證盛事作意思惟發生歡喜又依無嫉如於自身於他亦爾又依知恩謂有恩者念大師恩作意思惟發生歡喜由依彼故遠離衆苦及與苦因引發衆樂及與樂因如是思惟隨順修道歡喜事故便能證得速疾通慧又此思惟隨順修道歡喜事義廣說應知如所說相除此更無若過若增云何修習如所得道謂彼如是所生廣大無罪歡喜漑灌其心爲趣究竟於現法中心極思慕彼由如是心生思慕出離樂欲數數現行謂我何當能具足住如是聖處

如阿羅漢所具足住如是欲樂生已發勤精進無間  
常委於三十七菩提分法方便勤修又彼如是勤精  
進故不與在家家衆相雜住習近邊際諸坐臥具  
心樂遠離又彼如是發生欲樂發勤精進樂遠離已  
不生喜足謂於少分殊勝所證心無喜足於諸善法  
轉上轉勝轉微妙處希求而住由此四法攝受修道  
極善攝受卽此四種修道爲依如先所說諸歡喜事  
所生歡喜彼於爾時修圓滿最極損減方便道理煩  
惱斷故獲得殊勝所證法故亦令喜悅修得圓滿又  
修所斷惑品麤重已遠離故獲得輕安輕安故生身

心清涼極所攝受如是二種修得圓滿又此有學金  
剛喻定到究竟故修得圓滿是名修習如所得道又  
此修習如所得道義廣說應知謂四種法爲依止故  
能令五法修習圓滿除此更無若過若增云何證得  
極清淨道及果功德謂於三位樂位苦位不苦不樂  
位爲諸煩惱之所隨眠有二種補特伽羅多分所  
一者異生二者有學又有二種能發起雜染品一者  
取雜染品二者行雜染品卽爲斷此二雜染品入善  
說法毗柰耶時能爲障礙所有煩惱此諸煩惱能爲  
隨眠深遠入心又能發生種種諸苦若能於此無餘

永斷名爲證得極淨道果又十無學支所攝五無學  
蘊所謂戒蘊定蘊慧蘊解脫蘊解脫智見蘊名極清  
淨道又由證得此極淨道離十過失住聖所住云何  
名爲十種過失所謂依外諸欲所有愁歎憂苦種種  
惱亂苦相應過失又有依內不護諸根過失由不  
護諸根故生愁歎等又有愛味樂住過失又有行住  
放逸過失又有外道不共卽彼各別邪見所起語言  
尋思追求三種過失又有依靜慮邊際過失又有緣  
起所攝發起取雜染品過失又有發起行雜染品過  
失若於如是十種過失永不相應唯有最後身所任

持第二餘身畢竟不起於最寂靜涅槃界中究竟安  
住一切有情乃至上生第一有者於彼一切所有有  
情得爲最勝是故說名住聖所住以能遠離十種過  
失又能安住聖所住處故名功德又若彼果若極淨  
道若彼功德如是一切總略說名證得極清淨道及  
果功德又此證得極清淨道及果功德義廣說應知  
如所說相除此更無若過若增若得如是最上無學  
諸聖法者如是聖法相應之心於妙五欲極爲厭背  
無異熟故後更不續若世間心雖復已斷猶得現行  
彼於後時任運而滅又煩惱道後有業道於現法中

已永斷絕由彼絕故當來苦道更不復轉由此因果  
永滅盡故即名苦邊更無所餘無上無勝此中若入  
聖諦現觀若離障礙若爲證得速疾通慧作意思惟  
諸歡喜事若修習如所得道若證得極清淨道及果  
功德如是名爲出世間一切種清淨又此出世間一  
切種清淨義廣說應知如所說相除此更無若過若  
增如是若先所說世間一切種清淨若此所說出世  
間一切種清淨總略爲一說名修果如是如先所說  
若修處所若修因緣若修瑜伽若修果一切總說爲  
修所成地

瑜伽師地論卷第二十

音釋

篋戾車

梵語也此云邊地篋戾車莫結切戾郎計切

嚚

語巾切口不道記忠信之言爲嚚

注

蒯蒯必列切記蒯謂拔將來成佛之記劫國名號之蒯也

漑灌

漑古代切灌也灌古玩切

丹陽居士賀學易施資刻此  
瑜伽師地論第二十卷 益州沙門性淨對  
長洲徐普書 上元李茂松刻  
萬曆己亥春三月徑山寂曇庵識



5  
6  
7  
8  
9  
80  
1  
2  
3  
4  
5  
6  
7  
8  
9  
90  
1  
2  
3  
4  
5  
6  
7  
8  
9  
100  
1  
2  
3  
4  
5

已承斷絕由彼絕

萬劫引支卷三民國山東漢書

身世翁善書二十卷益限門掛刺捷

世世事土質學暴風資德世登得極清淨道

功德如是各為出世間一切種清淨又此出


五

德附文臨時因各觀之德也

德矣車

音

餘贈明此儲卷第二



夕  
四